

Jesocurisitohacha Coaratei

Afocarifisi

**“Naaonjoanrichaain,” naain
coaratiha Jesocurisitone**

1 ¹Caate, inae nichuuntaa nitohaneri-
chaainene jaun rai cachaneein
nenacaauru que coaratiha rai Calaohi
Jesocurisito aina cuaain Cana Coaunerane
jaa ne. Nii jaunte rai nere beraneein nena
Joan nichaanne rene, rai nere bera
anjera letoae Jesocurisito, canu que niicha
coaratei coaratiha nii anjerane coina.

²Nii jaunna, canu que coaratiha
Jesocurisito aina cuaain Cana Coaunerane
rijijieein, esinae rauhijiriin nii coaaraneein
coaracaaunne rijijieein laenaaun.

³Nerausiaecururichaain caa Cana
Coaunera beratenojoin reretaera aina
aonaain caa laenanohineein nihane
rijijieein tonoraain nenacaauru, inae
ichuunejeeoriha nitohanerichaainene
jaun.

**Caaunsi laurineein Jesocurisito
ranojineein nenacaauru iclesiacuru
rai laenaa Joanne**

⁴Asia batane que caainsii laurineein
Jesocurisito ranojineein nenacaauru
iclesiacuru raine canu Joanneein caa
laenaaun. Raotojoein neeichene jaanu
teen neeuruhine- nii nunuhe caje
coaauneein neein- ena acaneein neein
turuha uheneni neein nena Cana

Coaunera, rai nelaurianajaan- *trono*
acatiha caainsiineein suujueneein
nenacaauru aina, ⁵chaen esinae
rauhijiriin, aca jerihane rijijieein neein
nere beraneein nena Jesocurisitone
maajeein. Acate jauriaanejeein ohane
caje ichanaelu. Nii jaunte, satiin chaura-
tane sacuritaain nenacaauru curuaanaa-
curu curuaanaanein ne Jesocurisito.
Nii Curisitote jataain cana belaitohane
jaun, rai coichana aina cuaain osa caje
cana rocoelu. ⁶Nitohanein cana teeinte,
jelai teein rai cachaneein aihuruhalu
saseredotecurune rijijieein- rai Inaca
Cana Coaunera rai caohacha
icharanein- niicha jerenohin ichacaa-
chene coina cana teein nelu. Aihana
jaun Cana Coaunera necaohacha aina,
itolere niicha ichana nainai itolere bana
Jesocurisito rainein neeine. Nitohane-
miin.

⁷Inae nacoaaunein dede sacari jana
uhin fauha uha Curisitone janate,
satiin coaanojoinereein.

Nii sohin jaaoraluniha natiinte
coaraa cuurureein.

Nii jana caa chauratane que laurihu
laurihu ichaonacaauru cachaa-
rute,
chanaa cuurureein coreniha.
Aiha nitohanerichaain.

⁸“Canune nunuhe caje coaauneein itolere coauneraneein satono que tiaain acaneein neeun,” naa Cana Curuaanaa Cana Coaunera- itolere curuaanaanein turu rai nena.

**Jataain caohacha que necaohachaaain
necoaraatiha Jesocurisitone**

⁹Canune satiin inara nejera Joanneeun. Jesocurisito corenihate, canu nejeranein neeiche. Nii rijijieein techu, jiniiquiin coujunojoneein necairichanaa abaantaacache, laraajiin cana coroatajaniha Cana Coaunerane jaun. Nitohanihane jaunne, Cana Coauneraacha jerei Jesocurisitohacha coitucueratei beebelijhanune coreniha caseteconein Patmo cobeneu neeun. ¹⁰Ecute tomiho cojoanonaa bana, caniha neeoritoha Cana Coaunera Suujuene jana, canu janori nichaae toniin: ¹¹“Leinjiin quiricha cuhane iicha coarai laenaain, caainsii laurinein Asia batane que nenacaauru- Efeso, Esmirna, Pergamoo, Tiatira, Sardisi, Filadelfia, Laodisea, naaonjoainun Jesocurisito cachaneein nenacaauru rene letoaa,” naain mijiaaenein toniha carai jaiha rijijieein nena- toroonfeta rijitiin erenaane jana aonaaun. ¹²Nii carai erena coaracaanne coina nauriteri- chaanne janate, tirichotiin jiquihaquuin ne ecu caainsineein cono nujua- oro caje ichanohin. ¹³Nii caainsineein cono nujua- oro caje ichanohin cataaunne cache tocohanein- tijia que uujoai cajionequuin, somajain cajione que cajionequuin- nalarijia que uujoaain oro caje ichanohin sintoroon que ichoraane coaraaun. ¹⁴Nii jana rai couturi ujuite dede sacari tocohanein somajae. Jana, rai notate tirichotiin usi lanaro tocohane. ¹⁵Nii jana rai tijiaaurute, orono cuhane tucuhacaain ichanohin bronze tocohanein jiquihaque. Nii jana

rai nerete, jataain mijiaaenein caraturi toni rijitiin tonihane jana, ¹⁶rai raotono nichajai que caainsineein arasijie siri biji cuhane. Nii jana rai nujae cajete mitue jerane jataain ajinaain sabere. Nii jana rai merite, jataain conotiin conoha enotone tocohanein jiquihaque.

¹⁷⁻¹⁸Nii jaaunne coariin tijia asae comoon onaa rijijieein. Nete biji raotono nichajai que canu mucuhin: “Jiaonriha casine. Canune ichaohin itolere coaunaain satono que tiaain Coauneraneun. Canune niqui oonlu, nene ichanaaun. Inae charijibana orinaaunni. Canune cana asae nitajena- caauru rai chabi sirihun. ¹⁹Caa ena nena iicha coarai laenaain, caa baiha neeninu iicha coarai laenaun. ²⁰Caa canu biji raotono nichajai que caainsinei arasijie, chaen caainsinei cono nujuanein nena oro, naaonjoainuri iicha coaraite, charijibana coitucueraelanaala asinojonein nena ne. Nii caainsinei arasijiete Cana Coaunera ranojonein nenacaauru- iclesiacuru beraihurera anjeraauru ne. Jana nii caainsinei cono nujua oro caje ichanohinte, caainsii laurinein Cana Coaunera ranojonein nenacaauru- iclesiacuru ne.”

**Caaunsi laurinei iclesiacuru rai
beratenojoin. Caate nii caainsii
beratenojoi caje Efesoo Cana Coaunera
ranojonein nenacaauru iclesia beraicha-
anjera rai beratenojoin**

2 ¹“Caritiin Efesoo Cana Coaunera ranojoinuri- iclesia beraichanein nena- anjera rai laenaau.

‘Aonacuche, caritiinte inara rai laenarate nii biji raotono nichajai que caainsinei arasijie siichaain- cainsinei oro caje ichanohi usi nujua cataaun amunaa: ²Canuna, itolere iicha ichai

coitucuhin, caaintatohane niha natiin jianelanaala neeine coitucuun. Chaen nechuh, nii necha ansaneein ichaona-caauru abaantasineeine coitucuun. Chaen techu, afosotooru niha nocoetonacaauru niha natiin coujuhin coaraaine jana aca necurene. Nitohaneeinte casajenetooruhane coitucuhi. ³Itolere banate coiinteein jianelanaala jataain canu coreniha necairichanaa abaantaai.

⁴Nete jauriaanejeein aailune tocohaaneein corajeein quicha jerei icharaneen nenei. ⁵Aihane jaun, jauriaa aichejeto hilune que coacuhin, nii nunuhenein corajeein icharejeto hilune rijijeein nacoauneen corajeein quicha jerei icharaneen neen, jeriha Cana Coaunerane rijijeein. Ainihanena, nii nihane jaa jelai caje, nii cono nujuaneen nenea rulureeuni ii caje, nacoauneen Cana Coauneraacha jerei icharaneen ichoaeneene. ⁶Nete caohacha ichaai, nii Nicolasa sacuureraauru ichanohichuru rautaa in coaraeneene jaun. Canuhetonaichu acaauru ichanohichuru rautaa in coarahaan.

⁷Aohana jereraauru, caa ereretaain Cana Coaunera ranojoinuru- iclesiacuru rai Cana Coaunera Suujue beratenojoin aonacurumiin. Itolere necairichanaa abaantaain satono que tiaain sacuerate, nii chariji bana sanaachara ichaonaa tera enuha inaa Cana Coaunera nenajaun nenea que lenonereen, 'naain laenaau Efeso beraicha- anjera rai,"

nae nii canu notaara.

Esmirnau Cana Coaunera ranojoineein nenacaauru iclesia beraicha- anjera rai beratenojoi

⁸"Caritiin Esmirnau Cana Coaunera ranojoinuri- iclesia beraichaneen nenea- anjera rai laenaau:

'Aonacuche, caritiinte inara rai laenaerate nii nunuhe caje coauneen satono que tiaain acaneein nenea- ohalune caje ichanaain nenea: ⁹Canune jataain necairichanaa abaantaain, cairichanejeein neeichene coaraan. Nete chaque lanaeneriquicheen dedeeu. Chaen nechuh jataain baasoneen ichei ereeuruha Joriooniha nocoetonacaaurune coitucuun. Acaaurute esinae rauhijiriin moconajaera letono laurineen neeure. ¹⁰Jiaonriha necairichanaa coariquiline que casiin neeine. Moconajaerate caresero cuhane inara tabaauru enoaeratereneen, nii aina cuaain sati inara coujunojineen coanojoinequichene coina. Jataainte necairichariquicheen lechoonca janohin. Nete ohichene que tiaaojoaain nirijeein jianelanaala abaantaain sacuhichene, canu nii cainaraanueque chariji bana nitajenaacharanejeein nenea ichaonaa tereunni inara rai.

¹¹Aohana jereraauru caa Cana Coaunera ranojoinunru- iclesiacuru rai Cana Coaunera Suujue beratenojoin aonacurumiin. Laraajiin itolere necairichanaa amuritiin nenacaaurucoatiha ooruhaiha nacoauneen ohin nitajerinaain acaauru suujue,' naain laenaau Esmirnau Cana Coaunera ranojoinuri iclesia beraichaneen nenea anjera rai,"

nae nii canu nae nii canu notaara.

Pergamoo Cana Coaunera ranojoineein nenacaauru iclesia beraicha- anjera rai beratenojoi

¹²"Caritiin Pergamoo Cana Coaunera ranojoineein nenacaauru iclesia beraicha- anjera rai laenaan:

'Caate aitiin laenaerate nii nujuaa cuhane jerane jataain

ajinaain sabere siricha: ¹³Raotojoeine moconajaera rori rohan ichaohichene coitucuun. Nete atiin caitoonjoa esenetaain canuhacha icharatei ichaquichene jianelanaala neeiche. Niheichu nii canu ere bera Antipas sohin jaaoruhalu, nii moconajaera neseu natiin, canu esenetaain neeichene jianein niheeiche.

¹⁴Nete neeje ichei baaso, iniha nenacaauru que ichei aitocaaunne jaanu coitucuhine coina. Nii iniha nenacaauru tabaaurute, Israeli inoaensihuru relaain nihalu Balaamne jaacha tonoraain jianena jerecurene. Nii Balaamte baaso que Balac suujua-tihane jaun, ecaantooru que banijiaain nenea lenone que Israeli-taauru coroaatein, itolere osa que sarueratenajaaine maajeein naaonjoenlu. ¹⁵Chaen techu, tabaauru iniha nenacaauru acaauru relaain nihalu Nicolasa sacuurerane jaan jianena jerecurene.

¹⁶Aihana jaun, chajaain ena esinae Cana Coaunera esenetaeraneen jeriha Cana Coaunerane rijijieein quicha jerei icharaneen neeuche. Ainihanena ena inara rene uhin, nii canu ujuae cuhane jerane ajinaai nenea- sabere que acaauru soreeunni.

¹⁷Aohana jereraauru Cana Coaunera raonjoinuru iclesia rai Cana Coaunera Suujue beratenojoin aonacurumiin. Itolere necairichanaa abaantaain satono que tiaain sacuurera raine chariji bana coaraelanaala asinojoneen nenea manaa que acaauru coroaatereunni. Chaen nech, nii chariji bana coitucueraelanaala nenea- cacha curuaa siriin laenanohineen leinjiin ajeri somajain nenea tereuni acaauru rai. Nete laen nii ajeri raera, nii curuaa erora

coitucureein,' naain laenau Pergamoo Cana Coaunera ranojoinuri iclesia beraichaneen nenea anjera rai,"

nae nii canu notaara.

Tiatirau Cana Coaunera ranojoinuri beraicha- anjera rai beratenojoin

¹⁸"Jerichanejeeichu, Tiatirau janijiiin Cana Coaunera ranojoneen nenacaauru iclesia beraicha- anjera rai laenau:

'Caritiinte aitiin laenarate nii usi lanaro tocohanai notaain- coata lanajai jicharoanohi tocohanai tijiaain nenea- Cana Coaunera Calaohi:

¹⁹Canune jitariin iicha ichai coitucuun, jataain cachaaauru belaaain, iicha esenetai esenetaain, itolere necairichanaa abaantaain itolere ichaaine coitucuhane. Chaen nech, jataain jauriaalu amuritoheriin ena caohachaaain ichaaine coitucuun.

²⁰Nete neeen ichei aitocaaunne jaanu, Canu cachaneen nenacaauru coritaa, nech Cana Coaunera coitucueraniha nocoetiin, ecaantooru que banijiaain nenea lenone que acaauru coroaatein, chabana nitohanai osa que nesaruna nainenihai cachane saijieein itolere osa que acaauru roeroheca nii ene Jesabeline abaantaaine jaun. ²¹Canune niqui Cana Coaunera coitucueraneen nihane cojoaaun. Nete ainaa jerelanaala, niheichu osa tabai que nesaruhane jianena jerene.

²²⁻²³Nii jauna, nii ene cunaitaain bereecurune maajeein ateinereunni. Chaen nech, nii ene aina ichaojeraquiiin neeuruhane jianelanaala nenacaauru ateinaain, jataain necairichanaa tabai que cairichanajareunni. Nitohanein

ichacaaunne banate, suujua cuhane
cachaauruhacha coacuhi coitucuhanune
que nainaa cuurureein satiin Cana
Coaunera ranojoineein nenacaauru
iclesiacuru. Jana inara raine, le cacha
cachanequichene rai, inaraacha
ichanohin rijijieein inara rai tereeeunni.
²⁴Nete laen inara Tiতিরায় নেইকে-
chene, nii relanajaain neeuruhalune jaan
moconajaera suujua asinojoineein nena
coitucuhin tonoraain neneeichene, nihei
nii que tonaain inara rai irihanune jaanu.
²⁵Aihana jaun, turuhanune reentiaain
jerichanejeein sacuuche jianelanaala.

²⁶Itolere necairichanaa abaantaain
satono reentiaain canuhacha jerei
ichajeein sacuureraaurune cocoina-
reeunni, lauri lauri nenacaauru
cachaauru curuaanaanein neeuruhane
coina. ²⁷⁻²⁸Charijieein teinti canu
cocoinaain nelu Ofa Cana Coaunera, nii
rijijieeine inara cocoinareeunni, lauri
lauri nenacaauru cachaauru curuaanaa-
nein neeichene coina. Nii banate coata
caje nena otiha que erenaa tonoraela-
naala lauri lauri nenacaauru tuteneriqui-
cheein, darohe tutenecuruhane rijijieein.
Chaen nechuu nii choae tacaain
janonaarai mitunaa arasijie tereeeuni
acaauru rai.

²⁹Aohana jereraauru, caa Cana
Coaunera ranojoinuri iclesiacuru rai,
Cana Coaunera Suujue beratenojoin
aonacurumiin,”

naain laenarate nii canu notaara.

**Sardisihu Cana Coaunera ranojoineein
nenacaauru iclesia beraicha- anjera rai
beratenojoi**

3 ¹“Caritiin Sardisihu Cana Coaunera
ranojoinunru beraicha anjera rai
laenaau, naain laenarate nii caainsiinei
Cana Coaunera suujue aina caainsiinei
arasijie siricha:

‘Canune jitariin iicha ichai coitucuum.
Ichaohate niqui ii beeure. Nete inae ohi.

²Aihana jaun, itolere que caohachaaain
nainaaain nii cautenacaauru lararajiaau.
Inae ohin nitajeeuruhane raita neeure.
Chaen nechuu esinae rauhijiriin Cana
Coaunera notaracaae, caohachaaain iicha
ichai ichaain neneeine coitucuum. ³Nii
jeriha Cana Coaunerane rijijieein,
caohachaaain ichaohin neeine coina
nerelaailune coacuhin- nacooaunein
caohachaaain ichaao. Canu jerichaaune
rijijieein, itolere que nainaaain caohachaaain
ichaeneeine ne, coitucueniha cachane jana
turuhin basijiauha asijiautone rijijieein cha
coatejeneeine jana turuhin ii caseteca-
reeunni.

⁴Nete nii Sardisihu neeure coroa-
tajajeein chabana cajione calanoajela-
naala nenacaauru. Acaaurute cajione
somajai jiaain cajiniichaaain amuhe-
muhecureeain, nitohanein
neeuruhane coina nelatecuruhane
jaun. ⁵Itolere necairichanaa
abaantaain, canu jerichaaunne
rijijieein nenacaaurute, nitohanein
cajione somajai que necoreteeuru-
reein. Nii choae tacaainchu, canu
quiricha caje acaauru curuaa
elonarinaaunni. Chaen nechuu, canu
Inaca, rai anjeraauru, naonjoainuri
acatiha tein acaauru coitucureeuni.

⁶Aohana jereraauru, Cana
Coaunera ranojoinuri iclesia rai Cana
Coaunera Suujue beratenojoin
aonacurumiin,”

naain laenarate nii canu notaara.

**Filadelfiau Cana Coaunera ranojoineein
nenacaauru iclesia beraicha- anjera rai
beratenojoi**

⁷“Caritiin Filadelfiau Cana Coaunera
ranojoineein nenacaauru iclesia-
beraicha rai laenaau:

‘Caate aitiin laenaerate nii Rabiri rai chabi siricha- Cana Coaunera esineneen nenea. Acate acuuja joracaane, nii chuni funaa nainene. Jana acuuja fuhane, nihei chuni joaracaera. ⁸Canune jitariin iicha ichai coitucuun. Aonaaun, ii raine joaracanojineen canu acuuja siricheeunni, nerinaain chuni funaa nainera. Jataain laraajiin neeineque airijiinte, quere tonoraain quicha jerei icharaneen neei. ⁹Canune ichareeunni nii nechu moconajaera rai cacha raeraneen nenacaauru- nii Joriooneeuruhane que airijiin Jorioo-niha nocoetonacaauru- casajeeuru itiha asae neseonriaauruhane coina. Nii banate, jataain ii belaitohanune coitucuha cuurureein. ¹⁰Esinaete rauhijiriin, itolere bana caitoonjoan tonoraain canu jerichaaunne rijijieen neei. Nii jaauune, inae cojunojinecuruhane coina, satiin colurejenojinecururichaaun caa chauratane que nenacaurune bana, ii beraicheeunni chatohaneen teraaine coataa.

¹¹Enane nacooauneen turureeunni. Aihane jaun, caa ena neeine rijijieen jerichanejeen sacuu, nabana chuni ii que banijiaain nenea ruluhin raane coataa. ¹²Itolere necairichanaa abaantaain sacuureraaurune, Cana Coaunera loreri banesijianeen tihanune, nii chariji bana satonoelanaala caje mituelanaala ecu neeurureein. Chaen nechu, acaauru jaberoco que tein Cana Coaunera curuaa laenaain, dede caje ena nenea Cana Coaunera nenajan Jerosaleen curuaane maajeen laenareeunni, acaauru jaberoco que tein. Chaen nechu acaauru jaberoco que tein ena nenea canu curuaa laenareeunni.

¹³Aohana jereraauru, Cana Coaunera ranojoinuri iclesia beraicha-

anjera rai Cana Coaunera Suujue beratenojoin aonacurumiin,’”

naain laenarate nii canu notaara.

**Laodiseau Cana Coaunera ranojineen
nenacaauru iclesia beraicha- anjera rai
beratenojoi**

¹⁴“Caritiin Laodiseau Cana Coaunera ranojineen nenacaauru beraicha-anjera rai laenaau.

‘Caate aitiin laenarate nii Cana Coauneraacha ichai coaraneen, nohanelanaala beraneen itolere Cana Coauneraacha coaunai Coaunera Esine neen Nenea: ¹⁵Canune jitariin iicha ichai coitucuun. Bajianachuhinti canu jerichaaunne rijijieen, corajeein quicha jerei ichaeneei. Jana ainihane corajeein moconajaeraacha jerei ichaeneei. ¹⁶Nete quicha jerei corajeein ichaelanaala, niheichu moconajaeraacha jerei corajeein ichaeneine jaun, nii chaneen neneei. Nitohaneen ajajaineen niheichu, jelajerilanaala, naajoaain neeine jaun, chaneen neneine jaunne ii naraaareeunni canu ujuaae caje. ¹⁷Lite niqui Inae jataain raotojoeen nihanu cha latejelanaala, inae caohacha ichacaune jaun, naain ereei. Nete jataain cairichaaajoai, cairichanojineen aiha leinjiin cairichai cha colane nenea rijijieen neein- maosa rijijieen neeine jaun. ¹⁸Nii jaunne ichai aitoon, canu caje mocohin tucucanohin oro coreteine coina. Nii banate esinae rauhijiriin canu jerichaaunne rijijieen neen, aiha leinjiin cairichanejeen cha colane nenea rijijieen neeine caje, cha caohacha ichaain, caohachaaan chaachaaan neeine coaraain neriquiin.

¹⁹Canune satiin canuhacha belaa canu cachaauru baaso ichaain neeuruhane coaracaunne, acaauru

cotaain acaauru suujuatein cairichanajaaun. Aihane jaun, nii baaso ichajeein neeine jianelanaala baasoneein jerichanejeein sacuhinene ii cairichareeunni. Aihane jaun, chajaain ena caje coauneen nunuhteetein jeriha Cana Coaunerane rijijieein ichaao.

²⁰Aonaaun, canune itolere bana acuujuua beraicha rijijieein acuujuu-niha neein inara cotijiaaun. Chateeinti bajaee bajaacecaunne aonaaun canu raain ne rai suujua cuhane, nii ainane jiniiquiin lenonerichaanuhin.

²¹Chateeinti itolere necairichanaa abaantaain jerichanejeein jianelanaala sacue, nii raine canu rohan nelaoriaane jaanu rori tereeunni. Charijieein teeinti, itolere necairichanaa abaantaanune jaun, canu Inaca Ofa nelaorianajan rori ichoae jiniichaain nelaoriaaun, nii rijijieein.

²²Aohana jereraauru Cana Coaunera ranojoinuri iclesia beraichanjera rai Cana Coaunera Suujue beratenojoin aonacurumiin,”

naainte laenarate, nii Cana Coauneraacha ichai coaaraneein nohanelanaala beraneein- itolere Cana Coauneraacha coaunai coaunera esine neein nena.

Dedeeu Cana Coaunera coroaecuruhane

4 ¹Niritoha caraine baiha dede coaracaun jabatoroainne janate, joaracaeratihaneen ne cana dede bacuujuua. Nii janane, jauriaanejeein leinjiin jaiha rijijieein nena- toroonfeta rijitiin tonihane jana aonacaaunne janate:

“Chajaau cajiha iniha uune, caa baiha nitohaneen airichaaane coarate ii quete coaraaicha,” naain carai toni eheona.

²Nii rijieeoritiin, caniha neeoritoha Cana Coaunera Suujuene janane, dedeeu jataain caohatiin nelaoriananaja rori- *trono* coaracaunne janate, ecu nii nelaoriananaja rori- *trono* ichoae laujuae leinjiin. ³Nii nelaoriananaja rori ichoae nenaate, ajeri jataain caohati colohin nena- jaspe tocohanenihane cornalino tocohaneein jataain caohatiin colohe rai jaberoco. Nii nelaoriananaja rori tinonoritiinte, tinohanre leinjiin iino, jataain conotiin beraurosihojoaain colonaa esmeralda tocohaneein. ⁴Chaen nechuu nii nelaoriananaja rori- *trono* tinonoritiin niha jataain caohatiin coroata choonca jenaain rori caohachaaaurune jana coaracaune janate, ecu nichoae neeure coroata choonca jenaain ichauhenaaauru, somajaain cajione que cajionecohin, oro caje ichanohin comai siriiin. ⁵Nii rori- *trono* cajete, jataain mijiaaeneen mitue jiicano, erenaa, arara, naaonjoainuri. Nii janate, nii rori acatiha lanalanaque caainsineen siricho. Nii caainsine lanalanaqui sirichote, nii caainsine Cana Coaunera suujueneen ai. ⁶Chaen techu, nii rori- *trono* acatiha cucuana baca tocohaneein, jataain ajiarojoeritiin asaaun tiaain jiquihaquiiin inanacae. Nii nelaoriananaja rorihuru cataaun nena rori tinonoritiinte ne, jenaain cacha tocorijianeen, janori, nacatichai, naaonjoain jeloona notaacoaain. ⁷Nii leinjiinte aain tabai- leon tocohane. Leechate jana, baca curuaanaa toro tocohane. Jana nii acaauru nichatajate leinjiin cacha tocohane. Jana acaauru nejenate, uujuirii tabai- aquila tocohane. ⁸Nii jenai jelai rai nichao que ichaohi nenacaaaurute, nenainetiin saotaneen itarohin, jianacoon, asaaun, naaonjoaain acaauru jaberoco nainecojoaain nota sirichure. Janotiin, jiichoo, naaonjoaainte:

“Cana Curuaanaa Cana Coaunera esine,
itolere que laraajiin
itolere ichana naineraneein nena,
iite iineein neeilu,
enanetojoein acaneein neei-
iineein turuha uriquin,”

naaure jiichoo, janotiin, naaonjoaain
janelanaala.

⁹⁻¹⁰Nii cacha tocohaneein nenacaau-
rute, acaneein necaohachaa in niha- nii
rori caohacha ichoae- nii chariji bana
ohelanaala nenaane coroaacure. Nii
nainihate coroata choonca jenai
ichauhenaauru, nii ecu nenacaauru
nacatiha neseonriaain corojeein, nii
rori acatiha acaauru rai comai siheitiin:

¹¹ “Iite esinae rauhijiriin,
canacaanu Curuaanaaneein
canacaanu Coauneraneein-
ii necaohacha que iineein neei,
laraajiin.
Iite itolere coaunaain neeilune
jaaun,
ii jereene rijijieein necoaunaain
nihacoaelu,”

naaure coroaecuruhane naineein.

**Quiricha laenanohineein nena aina
carenero narejeen**

5 ¹Nii janate nii rori caohacha choaae
lauheconaa coaracaanne jana biji
raotono nichajai que leinjiin Quiricha
sichaa in lauheque. Nii quirichate
retutonohineein, jeranu laenanohineein
ne, caainsinei fuera que caohatiin
funojieein. ²Nii jana coaracaanne
janate ecu ne leinjiin anjera jataain
itolere ichana nainihane que nelateein.
Nii anjerate jataain tonijiaain: “Chana
jataain nelate que nelateein, caa
quiricha fuera beuhin joracanaa
naaine,” naain bajae.

³Nete dedeeu, chauratane tinonocori-
tiin, chauratane asaae, naojoaain niha
natiin nene chunei nii quiricha
joaracaain coana nainera. ⁴Nitoha-
neein neniha chunei nii coina nelateein
nii quiricha joracaain coaraain
ereretanaa nainera cachana jaaunne
jataain chanaaun. ⁵Nii janate: “Coa
jataain chanaa. Niha leinjiin nii coina
nena- nainera. Acate Joda lauri caje
nena Leeon- cana curuanaa inoaensi
Rabiri nefoerate ne. Niite nitohane
ichana nainihane coina itolere amuritiin
nihane jaun, nii cainsineein nena rai
fuera soaain joaracareein,” nae canu rai
leinjiin acaauru bichauhena.

⁶Nii janate, nii nelauriananaja rori
caohacha- *trono* aina nii jenaain rai nichao
que ichaohin nenacaauru, nii coroata
choonca jenai ichauhenaauru,
naaonjoaainunri cataaun niha Carenero
Narejeen ne jana coaraaun. Nii Carenero
Narejeen coaracaanne janate ecu
chujuheque, cairichaa in atinanojoiniha-
lune saijieein, Cana Coaunera Calao
Jesosoneein. Nii Carenero Narejeente,
caainsiniha rai jichone jana caainsine rai
nota. Niichurute Cana Coaunera
suujueneein satiin chauratane que
letononeein neeure. ⁷Nii Carenero
Narejeente cutiin, nii rori caohacha choaae
raotono nichajai que quiricha siichaa in
lauheconaa caje quiricha raaori. ⁸Nitoha-
neein nii quiricha raaoriha nii Carenero
Narejeenne rijieeoritiinte, neseonriaaure
nii Carenero Narejeen acatiha, nii jenaain
ichaohin nenacaauru aina, nii coroata
choonca jenaain nenacaauru ichauhe-
naaauru. Satiin acaaurute, nenainetiin
quitara rijijieein nena- arapa sirichure.
Chaen techu, nenainetiin oro caje nena
acau cooruhane jaan- curu nainecojoaain
enuha sacari juuaain nena sirichure- nii
coroata choonca jenai ichauhenaauru. Nii
enuha sacari juujuite Cana Coaunera

bajaauruha Cana Coaunera cachaneein
nenacaaurune jaan neein ne. ⁹Nitohaneein
neente ena nena nenatena que nenateein:

“Ite nii quiricha fuera soaain
joracanaa naineei.

Ii sohin jaaoruhane janate,
ii coichana que acaauru coreteei,
acaauru ranaa nainiha Cana

Coaunerane coina.
Nitohaneeinte,
satiin caa chauratane tinonocoritiin

lauri lauri neein nenacaauru
cachaauru,

lauri lauri nere que ereein,
naaonjoaainunri caje raain,
cachaauru coreteei
acaauru ranaa nainiha Cana

Coaunerane coina.
Nitohaneein ichaaina jaunte,
quiricha fuera soaain joracanaa
naineei.

¹⁰ Nitohaneeinte acaauru cocoaainai,
saseredote neein, curuaanaa neein,
naaonjoaaineein neeuruhane coina.
Nii jaunte, satiin chauratane
sacutaain curuaanaa neein
neeuere,”

naain nenatecure nii coroata choonca
jenai ichauhenaauru.

¹¹ Nii baiha coaracaauune janate, ecu
ereerecure arajiin nii rori- *trono* caohacha
rohan nenacaauru anjeraauru. Nii baiha
jenai ichaohin nenacaauru, nii coroata-
choonca jenai ichauhenaauru
naaonjoainuri. Nii janate ecu neeuere
jataain arajiin oaraanca milloonneein
amurijiriin. ¹² Acaaurute jataain tonijiaain:

“Jataainte nelate
nii sohin jaonojoneein nenaalu
Carenero Narejeen.
Nii jaunte,
itolere ichana nainihane jaanu,

itolere nerausiajeein nihane jaanu,
itolere coitucuhin nihanu jaanu,
itolere que laraajiin nihanu jaanu,
coasitanojoinihane jaanu,
necaohacha que necaohachaane
jaanu,
coroaenojoneein nihane jaanu,
naaonjoaain raeranein ne,”

naaure nii araai oaraanca milloonneein
nenacaauru anjeraauru.

¹³ Nii rijieeoritiinne, ereerecuruha
satiin Cana Coauneraacha coaunanohine
jana aonaaun. Satiin dede que teein
niicha coaaunai, atane que teein niicha
coaaunai, nii baiha satiin cana temurau
cucua cuhane nenacaauru, atane
cuhane nenacaauru, naaonjoaainunri
Cana Coauneraacha coaaunai ere
aonaaun.

“Nii rori choae lauheconaa,
chaen nii Carenero Narejeen, naaon-
joaaihunrite,
coroaenojoneein aca neein
necaohacha que necaohachaain
nelate que
nelatein neeuruhane jaanu teeure,”

naain ereerecure.

¹⁴ Nii janate, “Nitohaneein neeine,”
naaure nii jenai ichaohin nenacaauru.

Nii jana, nii coroata choonca jenai
ichauhenaaurute, nii Carenero Narejeen
acatiha neseenriaain coroaecure.

Caainsine fuera

6 ¹ Jaurihanejeein, leinjiin fuera
joracaa nii Carenero Narejeenne
jana coarajihanune janate, nii jenaain
ichaohin nenacaauru caje leinjiin ere
arara rijitojaaintiin tonijiaain toniin:
“Chajaau cajiha,” naane jana,
² coaracaauune janate ecu leinjiin
cabario somajain choae lajuuae leinjiin

cacha tenuna sijiaain. Nitohaneein comai teeuruha nii cacha raine baihate, amue nii que nejeratenacaauru amuritiin, itolere bana acaauru amuritoeraneein nihane coina.

³Nii janate, nii fuera que jaurii joracaa nii Carenero Narejeenne jana, nii ichaohin nenacaauru coroataja: “Chajaau,” naane jana aonaain coaracaaunne jana, ⁴ecu mitue leeocho cabario lanajaain. Nii janate nii cabario choaae nelaurianaa rai nelatei teeure, ita sohin ita jaaoruha caa chauratane sacutaain nenacaauru ne coina. Nitohaneeinte leinjiin Sabere seonjoa teeure nii cabario choaae nelaurianaa cacha rai.

⁵Nii baiha, nii fuera nichataja joracaa Carenero Narejeenne jana coarajiha-nune janate, nii ichaohin nenacaauru caje acaauru nichataja:

“Chajaau” naane jana coaracaaunne janate, ecu mitue cabario jichojoaain. Nii janate, nii cabario jichojoai choaae lauheconaa leinjiin balaansa siichae.

⁶Nii janate, nii jenai ichaohin nenacaauru caje ecu toniin:

“Le quilojoei aroso rijijieein nenea tiricote corereein le janohin amihanenaa neein. Nii jana, nichata quiloj aroso rijijieein nenea sebadate corereein le janohin amihanenaa neein. Coa laen erene, bino, naaonjoaain aasaeca,” naain toni erenaa nii jenaain ichaohin nenacaauru cataaun toniin.

⁷Nii fuera nejena joracaa nii Carenero Narejeenne janate: “Chajaau,” nae nii jenai ichaohin nenacaauru caje leinjiin. Nii jana coaracaaunne janate, ⁸ecu ne cabario somaajiojoaain. Nii cabario choaae nelauriaain cunaa curuaate Onaane. Nii ichohachaniha unaa caaijie unaate onaa curuaanaa moconajaerane. Nii Onaa curuaanaa- moconajaera raite, chauratane neleru nejena que niicha

ichana nainei ichaane jaanu teeure, ita sohin ita jaaoruha arajiin cachaaaurune coina, tabai mijitena caaun ooruha cachaaaurune coina, cunai caaun ooruha cachaaaurune coina, cachaauru sooruha atane que nenacaauru aain tocohaneein nenacaauru coitucuchuhichurune coina.

⁹Inae nii fuera nesaogui joracaa Carenero Narejeenne jana coaracaaunne janate, Cana Coaunera belaihuruhane jaan rori- *altar* asaae neeure Cana Coaunera beratenojoin beeuruhane coreniha atinanohichuru. ¹⁰Nitohaneein ecu neeinte jataain tonijiaain: “Itolere curuaanaacuru amuritoheriin Curuaanaa- osa colane nenea saanto-cha ichaaine coina aitohine icharanein nenea, chatohanai bana caa chauratane que nenacaauru ichao colurujueein, canacaanu atinaeraauru cairichareei,” naaure nii ecu nenacaauru onacaauru.

¹¹Niritocuruhane janate, acaauru rai cajione somajain teein: “Jauriaa nebetacaorihuche coa carajaeriin. Jaiti lanajeeca, inara sohin jaaoruha ne rijijieein, leeochoauru inara nejeraauru Jesocurisito beratenojoin beeurera sohin jaaoruhane nainaaauruhane reeintiaain cohacorihuche,” nae acaauru rai.

¹²Nii fuera nesaotane joracaa Carenero Narejeenne jana coaracaaunne janate, uhe jataain mijiaaaineein carora tabai. Nii janate, jataain jicholeneein conoene enoto. Nii janate, atene netonai conoelanaala ichana tocohaneein ne. ¹³Nii janate, jataain mijiaainetiin uhin liaaca cujuananee jana naluha *iquera* inaa nujuarine amuneein nalue dede caje chauratane choaae arasijie. ¹⁴Nii janate, retutunohi-niha faferone tocohaneein nereetuhitiin nitajiheite dede. Nii janate, nerurujuaa-coaain nelonae satiin situha cataaun nenacaauru obenecuru aina ichatane ucuunooru. ¹⁵Nii jaunte, chauratane que

satiin curuaanaa neein nenacaauru atane jachuuru cuhane, ichatane cataaun nenacaauru ajeri cuhaneeruru nasichure, tabaaihuri aina jiniiquiin, chaen soondarooru curuaanaacuru, coriquihonacaauru, jataain itolere que laraajiiin nenacaauru. Cairichanojoneein nenacaauru, chaen cha ujuaiahonelanaala nenacaauru, naaonjoainuri nasichure atane jachu, ajeri jachu, naaonjoainunri cuhane. ¹⁶Nitohaneinte: “Canacaanu choaae nefaruhin canacaanu asihu, canacaanu coaraa taa rori caohacha- *trono* choaae lajuaine coataa, jataain necairichanaa cuhane canacaanu casetecaa Carenero Narejeenne coataa. ¹⁷Inae catohanein caseteco coaraain necairichanaa cojoanonaa que turuhane jaun, nerinaain chunei abaantanaa nainera,” naaure.

Israeli laurichuru cojunacatenohineein nenacaauru

7 ¹Nii baiha coaracaaunne janate, enoto mitu jeloön, enoto soo jeloön, enoto soo coarajeein cana raotono jeloön, enoto soo coarajeein cana ajaabiji jeloön, naaonjoainuri jeloön chujurijiatocure jenaain anjeraauru. Ecu neeinte situha nii jenai laurii jeloön caje uhin cujuane coataa acatecure. Nabana situhi chauratane, cucuana, nuna, naaonjoainuri ichoae situhin jiatuhane coataa. ²Chaen techu coaracaaune jana, enoto mitu asajai caje uhe leinjiin anjera. Acate Cana Coaunera ichaohin nena cojunaca *seecho* siri. Nii anjerate tonijiaain eheque, nii jenaain nenacaauru anjeraauru, chauratane, cucuana cuhanai, naaonjoainuri aasaena nainecuruhane jaanu raaurera rai. Nitohanein tonijiaain ehequiinte:

³“Jiaonriha jaiti Cana Coaunera cachaneein nenacaauru nauri que Cana Coaunera cojunaca siricha *seecho*

tenihacachene jana, chauratane, cucuana, nunacuru, naaonjoainunri aasaecache,” naain, eeheque nii leinjiin nii jenaai naraai aanjeraauru rai.

⁴Nii jana, aonacaaunne janate, le faasha jena choonca oaraancaain satiin Israelitaauru lauri caje nauri que Cana Coaunera cojunaca *seecho* sirichaauru curuaacuru janiichure. ⁵Nitohaneinte,

Jodaa lauri caje lechoonca coroata oaraancaain nauri que Cana Coaunera cojunaca *seecho* que cojunacatenoine.

Jana Robeen lauri caje lechoonca coroata oaraancaain.

Jana Gada lauri caje lechoonca coroata oaraancaain.

⁶Jana Asere lauri caje lechoonca coroata oaraancaain.

Jana Nefatalii lauri caje lechoonca coroata oaraancaain.

Jana Manasee lauri caje lechoonca coroata oaraancaain.

⁷Jana Simeon lauri caje lechoonca coroata oaraancaain.

Jana Lebi lauri caje lechoonca coroata oaraancaain.

Jana Isacara lauri caje lechoonca coroata oaraancaain.

⁸Jana Saboloon lauri caje lechoonca coroata oaraancaain.

Jana Jose lauri caje lechoonca coroata oaraancaain.

Jana Beenjamiin lauri caje lechoonca coroata oaraancaain naaonjoaain Cana Coaunera cojunaca siricha *seecho* que acaauru auri que cojunacatenoinecuruhane janiichuruhane jana aonaan.

Arajiin cachaauru somajai que cajianecooruhane

⁹Nii baiha coaracaaunne janate, ecu araai lauriinchuru satiin chauratane sacutaain nenacaauru, araai lauriin nere que ereein nenacaauru, jelai natane que ichaohin nenacaauru, naaonjoainuri

cachaauru ecu arajiin neeure. Acaaurute rori caohacha- *trono* aina Carenero Narejeen acatiha ecu arajiin chujuhacoore janiinacaje lanaala. Nitohaneeinte cajione somanerei que cajionecohinte, elele tocorijiane sijjiariin cuure. ¹⁰Nitohaneein cuhinte, tonijiaain ehequiin:

“Cana Coaunera- rai rori caohacha- *trono* ichoae nenea aina nii rai Carenero Narejeente, arajiin itolere, que nejeratenacaauru amuritoeranein ne,”

naaure tonijiaain nii ecu satiin caa chauratane sacutaain nenacaauru araai laurii cachaauru. ¹¹Nii janate nii rori caohacha aina nii coroata choonca jenai ichauhe-naauru, nii jenai ichaohin nenacaauru, naaonjoainuri tionoritiin chujuhacoore satiin anjeraauru. Nitohaneeinte nii rori caohacha acatiha neseeonriaain, atane que nauri turuanacanejeein nenorocooain Cana Coaunera coroaacure nii anjeraauru.

- ¹² “Nitohaneein neeuruhine. Jataain caohatoha Cana Coaunerane coitucuuruhine itolere bana. Necaohacha que necaohachaa Cana Coaunerane coitucuuruhine itolere bana. Jataain itolere coitucueranein niha Cana Coaunerane coitucuuruhine itolere bana. ‘Narihara,’ naauruhine acaauru rausiaaeca Cana Coaunerane coreniha itolere bana. Jataain nelatiha Cana Coaunerane coitucuuruhine itolere bana. Acaneein nihane coitucuhin, itolere icharanein laraajiin nihane coitucuuruhine. Nitohaneein neeuruhine chabana satonoelanaala. Nitohaneein neeine,”

naain, Cana Coaunera cocoasitaure satiin nii ecu nenacaauru anjeraauru.

¹³Nii janate, nii coroata choonca jenaain ichauhenaauru caje leinjiin canu rai:

“Chaaauruna caa somajai cajione que cajionecohacoaain cau ne. Chaaelai cajena uure,” naain canu caje bajaane janane: ¹⁴“Iite acaauru coitucuhicha curuaanaa,” naain tonoraau.

Nii jaunte canu rai: “Caa cachaaurute necairichanaa tabai abaantaauruhana jaaun, Carenero Narejeen coichana aina cuaaain somarianohiniha acaauru cajionene jaaun nesomariaain nedae acaauru cajione.

¹⁵Nii jaaunte,

nii Cana Coaunera rai rori caohacha- *trono* acatiha neeure, jiichoo, janotiin, naaonjoaain Cana Coauneraacha jerei ichacuruha rai Teenforo asaaene coina.

Nii rori caohacha choaae lauhec-naate acaauru beraicheein acaauru rohan neein.

¹⁶ Mijitena, cocoirena, enoto ajaano, ajaaronaa, naaonjoaain niha natiin acaauru roeocarinaai,

¹⁷ acaauru beraiha nii rori caohacha cataaun nenea Carenero Narejeen ne jaaun.

Nii Carenero Narejeente acaauru beraicheein, carenero beraihu-ruha beraihurerane rijijieein.

Acate, esinaaeca caohacha-ichaonaa tera que acaauru cocoa-reein,

raotojoein ichaaoruhane coina.

Inae acaauru coroatajaniha Cana Coaunerane jaun necairichanaa coaraain chanaauru-rinaai chabana,”

nae nii coroata choonca jenaain ichauhenaauru caje leinjiin.

**Nii fuera caainsine aina jujuai
mocooruhane jaan curu oro caje nena**

8 ¹Nii fuera caainsine joracaa Carenero Narejeenne janate, carajaaajoaain curuatoraain curuaae-coore dedeeu nenacaauru.

²Nii catiariine ecu caainsinei anjeraauru coaraaun Cana Coaunera acatiha chujurujua chujurujuaauruhane jana. Nii janate nii caainsine anjeraauru nainetiin nii toroonfeta teeure. ³Nii janate uhe leeocho anjera, jujuai mocooruhane jaan curu oro caje nena uhaain. Nitohaneein uhinte, nichaaurae nii Cana Coaunera belaihuruhane jaan rori *altar* acatiha. Nii janate tabaain nii enuha sacari jujuai teeure, nii rori caohacha oro caje ichanohi *altar* acatiha, ichoae tein mocohane coina. Nitohaneeinte mocohane nainiha Cana Coaunera bajaaure nii ecu satiin Cana Coaunera cachaneein nenacaauru. ⁴Nitohaneein nii enuha sacari jujuai mocoha nii anjerane janate, rai biji caje Cana Coaunera acatiha ecuun cue rai cousuraca. Mocohane nainiha Cana Coaunera bajaaure nii ecu satiin Cana Coaunera cachaneein nenacaauru. ⁵Nii baiha, nii enuha sacari jujuai mocohane jaan curu raaoriin, Cana Coaunera belaihuruhane jaan rori caje, usi biine taotaoriin nii curu cuhane tein, usi biine joae nii anjera atane choaa. Nii janate, toni arara, erenaa, jiacano, carora, naaonjoaainunri jataain mijiaaneein.

Toroonfeta toteeuruha anjeraaurune

⁶Nii janate, inae neruujeeure nii caainsine anjeraauru acaauru rai toroonfeta toteeuruhane coina.

⁷Inae rai toroonfeta totiha nii leinjiin anjerane janate, chauratane ichoae nalue jelajinaa jaberoco aina usi ichana que jasisiin. Nii jaunte chauratane neleru nichataja mocohane jaun, satiin

chauratane neleru nichataja que nenacaauru nunacuru, chaen omanecuru, naaonjoaainunri mocoe.

⁸Nii jana rai toroonfeta totiha nii anjera corootajane janate, dede caje nalue jataain tabai usi jaberoco cucuana cuhanene jana, nii cucuana neleru nichataja neleruhin ichana tocohaneein nedae rai baca. ⁹Nii naluha usi jaberococone jaunte, itolere nii cucuana cuhane nenacaauru nichata saain neleruhin oore. Nii cucuana cuhane nenacaauru boteeuru netonaite nichata saain neleruhin mocohin nitajeeure.

¹⁰Nii janate, rai toroonfeta totiha anjera nichatajane jana, siricho tocohaneein mocohin dede caje nalue arasijie seeonjoa, satiin nucuhecuro nichata neleru aina atane jachu caje mitunacaauro esinaaeca ichoaa. ¹¹Nii arasijie curuaate Elonaine. Nii jaunte nichata saain neleruhin elonaa nucuhecuro baca aina atane jachu caje mitunaa esinaa-cane jaun, ohacooaure arajiin cachaauro.

¹²Nii janate rai toroonfeta totiha nii anjera nejeneane jana, nichata saain nelerujuacoaain nocohejaaitiin naasajeein conoene enoto, atene, arasijie, naaonjoaainunri. Nii jaaunte, jiichoo aina nocohena nichata neleru que carajaaain conoene nii enoto, atene, arasijie, naaonjoain.

¹³Nii jana coaracaauune janate, dede catai jelon jiaauluhin situha cuha leinjiin uujuirii tocohaneeine jana aonacaauune janate: “Jataainte cairichaaajoaaurureein caa chauratane que ichaonacaauru cachaauro, inae toroonfeta toteeuruha nii leeocho nichatajai anjeraaurune,” nae leinjiin uujuirii tocohanei tonijiaain.

9 ¹Nii janate, toroonfeta totiha anjera nesaoquine jana dede caje naluha uha arasijie chauratane choaaene jana

coaraaun. Nii arasijie raite, cana asajai cochabi teeure. ²Nii cana asaae nenea atane jachu bacuujuwa joaracaane janate, jelai caje mitue suruaa orono caje aihane tocohaneein. Nii suruaate nocohenaneein enoto teein, cujuanane maajeein nocohena neein te. ³Nii janate, nii suruaa caje mituhin chauratane sacuritaain riaaniha sisiincho semanaane jana, aiha canaunne rijijieein cacha cunaitaane jaanu teeure rai. ⁴Nitohaneeinte letoanajaain, omane, ajaena, enuha, naaonjoaainunri aasaacuruhane caohateein, nii nauri que Cana Coaunera cojunaca siricha *seecho* que cojunacatenohine lanaala nenacaauru cunaitaauruhane coina aitocure nii sisiincho semanaa rai. ⁵Nete cachaauru atinaauruhane coina letononeeurene. Raujiaaaincha cacha atinaelanaala cusihane, canaun cusi rijitocojoaain cunaain saoqui ateein cacha cunaitaauruhane coina aitiin letononeeure. ⁶Nii cojoanonaa banate niqúi onaa jerecurureein cachaauru, nete oorenereein jaiti ooruhane jaan que turuenihane jaun. ⁷Nii sisiinchoo-rute, sonaana que neeuruhane coina relanojoneein nenacaauru cabario tocorijianein, oro caje nenea- comai tocohanai que asihocoin cacha meri tocorijiane acaauru meri. ⁸Nii sisiinchooru couturi ujuite caratohanae ene couturi ujui tocohaneein. Rai catute aain tabai tocohaneein nenea- leon catu tocorijiane. ⁹Acaauru jaberocote, coata que bujuaain ne. Jana acaauru itarote jataain mijiaaínein toni jiaauluuruha ne. Sonaana que neein caro tararaa cabarione jana tonihane rijitocojoaain toni. ¹⁰Jana rai cusite rai nuseei que ne, canaun cusi tocohaneein. Nii rai cusi que cacha cunaitaraneinte neeurelu saoqui ateein. ¹¹Nii sisiinchooru curuaanaate cana asaae

atane jachu cuhane nenea anjerane. Jana rai curuaate Ebereeo ere cuhane Abadoonne. Jana Curieco ere cuhanete, Apolihoonne.

¹²Nitohaneeinte situe nii necairi-chanaa nunuhe. Nete jaiti lanae coroatajai.

¹³Inae rai toroonfeta totiha nii anjera nesaotanene janate, Cana Coaunera acatiha oro caje nenea rori- *altar* que jenaain nenea jicho caje toni eheeona.

¹⁴Nitohaneein toniinte:

“Nii jenaai anjeraauru ichoharaain nenacaauru jihaneeu. Acaaurute nucue tabai Eofarate auhaniha ichohanohineein neeure,” nae nii eheeona.

¹⁵Nitohaneeinte, nii jenai anjeraauru jianecure, cachaauru nichata neleru sohin jaaoruhane coina. Nitohanei ichacuruhane coina jatoroaain neeuruhane bajaanaa, rai batene, cojoanonaa, naaonjoain que inae tihane jaun. ¹⁶Nii jana aonanaacaunne janate, ecu neeure coroata fasha millonnein cabario choaae cunacaauru soonda-rooru.

¹⁷Nii cabario choaae nelaauriana-caauru coaracaaunne janate, usi lanaro tocohaneein nenea que bujuatenohini-jiacoe acaauru nalarijiaauru. Nichata lauriinte coloe nii acaauru nalarijia que nenea coata, beraurusiojoaain, lanajio-joaain, asofere tocohaneein, naaonjoaain. Jana nii cabariocuru couturite janolari couturi tocorijianihane jana acaauru ujuae caje mitue suraa, usi, asofere, naaonjoain. ¹⁸Nii cabariocuru ujuaae caje cacha cairichae-ranu que mitunaa suraa, usi, asofere, naaonjoaain caaunte nichata saain neleruhin ohacoaaure cachaauru.

¹⁹Nitohaneeinte rai nujuaae cuhane, rai nuseei que, naaonjoaain nii nitohanei ichaane jaanu rai nelate sirichure nii

cabariocuru. Nii rai nuseeite acano tocohane. Chaen rai coturi quete cacha cunaitaure. Arajii cachaaurute ohe nii necairichanaa caaun.

²⁰Nete acaauru cautecuru nii necairichanaa caje nichotenacaauru, enaneto-joein baaso ichacuruhane jianecurene. Nii jaunte, Moconajaeracuru bajaebajae-curuhane jianecurenihane jaun jerichanejeein oro caje nenea ecaantooru, coata- bronze caje nenea ecaanto, coata plata caje nenea ecaanto, ajeri caje nenea ecaanto, chaen enuha caje nenea ecaanto, naaonjoaain bajaebajaeure, ichaohin, nerurujaain, amuhin, ereein, notaain, naaonjoaauruhane que airijiin.

²¹Niheichu sonajaain jaohin, benane neein, nitohanai osa que nesaruhi nenea nainenihia cacha natiin namute quicha aina ichaohin niha natiin, baaso osa que nesaruhi, asijiauhin, naaonjoaain ichaauruhane jianecuruhi.

Quiricha laenanohi siichaa anjerane

10 ¹Nii jana coaracaanne janate, dede sacari catauun, couturi ichooae iino baijiaain, dede caje fauha uhe- jataain nelate que nelatei leeocho anjera. Enoto tocohaneein jiquihacoha rai merine janate, usi lanaro tocohane rai fero. ²Nitohaneinte biji cuhane retutunohineein joaracanojoi quiricha sichaain, cucuana ichooae rai tijia raotono nichajai teein, rai jera najaa biji nichajai te chauratane ichoae. ³Nii anjerate, nesari corajiha mijiaaenein aitoha aainne rijitiin tonijiaain ere. Nii jana, caainsinei araracurute tonihure. ⁴Nii toniha caainsinei ararane baiha, quiricha cuhane laenana jerichaaunne janate:

“Ii suujua cuhane aitiin toniha nii caainsinei ararane jaan rucuhecu chunei rai belanaala. Coa quiricha cuhane laenaa,” naain dedeeu toni.

⁵Nii ereeuruha caainsinei araracurune catiaaeriinte, nii cucuana choaae raotono nichajai tijia chujuhecaain, chauratane que jera chujuhequera, raotono nichajai biji sijitae.

⁶⁻⁷“Inae nenacaen nerinaain cojoanonaa. Inae toroonfeta totiha nii anjera necaainsineen janate, inae asinojoneein Cana Coauneraacha sirii que turuhane jaan aicheein, nii aitiin berejetocuruhalu nere bera inoaensihurune rijijiein,” nae, itolere bana ichaohin, dede, chauratane, cucuana, chaen itolereeuu coneraneen nenacaauru, naaonjoaainunri coauneraneen nenea Cana Coaunera notaracaa neein aitohane coarateein nii anjera.

⁸Coaiteen nii dedeeu toniin quicha aonai erenaate:

“Chajaain cuhin, nii cucuana aina chauratane choaae chujuhequi anjera caje nii quiricha laojori joracanojoneein-niicha siichai raaorinihu,” nae canu rai.

⁹Niritoha canu raine jaun, cuhin nii quiricha bajaanune janate:

“Nocoo. Quihu. Chujuaae cuhanete irichaje rijitocojoaain ichohantoreein. Nete laen ii suri cuhane elonaineen nerotoreein,” nae carai nii anjera. ¹⁰Nii jana nii anjera biji caje nii quiricha raaoriin quihanune janate, canu ujuaae cuhane irichaje rijitocojoaain ichohante. Nete inae quihanune baiha, canu suri cuhane elonaineen nerotoe. ¹¹Nii janate:

“Coaiteen, araai laurii cachaaauru, lauri lauri jelai tein atane siriiin que ichaonacaauru, nere que ereein nenacaauru, itolere curuaanaacuru, naaonjoaainunri que aitiin Cana Coauneraacha beratei beebejiha cuhinet ne,” naaure canu rai.

Niicha icharatei coaaranuuru letoaa corootajaain Cana Coaunerane

11 ¹Nii baihate, carai jiarana tocohanein leinjiin bara tein: “Chajaain nimichuhin cuhin

Jerosaleeun nenea Cana Coaunera bajaauruhane jaan coloheri, Cana Coaunera belaihuruhane jaan rori, naaonjoaainunri cojunacateu. Chaen ecu janiichu, inaaajoaaincha Cana Coaunera coroaacea neeureein. ²Cana Coaunera bajaauruhane jaan coloheri rohan nenea airiniha cojunacatiha. Niite teeure Jorioniheichuru rai. Acaaurute Cana Coaunera nese cocoaichacuru amiharateeureein, jataain cairichanajaain, jena choonca coroata ateineein. ³Canune coroatajai canu ere beeurera letoareeunni, uhin le oaraanca coroata fasha saota choonca janoneein canu ere beeuruhane coina,” naain canu letoaaure.

⁴Nii coroatajai Cana Coaunera ere beracurute coroatajai olibo nujuan aina coroatajai usi temura neein neeure, cana rai chauratane coauneraneein nenea Cana Coaunera acatiha. ⁵Chunocoha chatohaneein acaauru tenaa jerera nihanete, acaauru ujuaae caje usi mitaaurureein jitariin acaauru que nejeratenacaauru mocohane nitajeeuruhane coina. Nitohaneeinte oorureein nii acaauru rohecaeraaauru. ⁶Nii coroatajaihurite nelate que nelateein, cana dede funaa nainecurureein Cana Coaunera ere beebejeeuruhane jana uha elo ne coataa. Chaen techu, ichana neein acau corenaa naainecurureein. Nii rijijieein techu, araai laurii necairichanaa turuanaa nainecurureein caa cana rai chauratane que, acaauru jerecuruhane tocohaneein.

⁷Inae acaauru que Cana Coauneraacha beratenojoi benaa naainaauruhane janate, mitureein cana asajai caje leinjiin neecha aansai ataebinae tabai, acaauru sohin acaauru jaohane coina. ⁸Nitohaneein acaauru sohin acaauru jaohane janate, Cana Coaunera Calaohi cairichaauruha coroso

quene jaan nese coero cuhane nereein acaauru jaberoco. Jerosaleen nihane saijieein Sodoma, Egipto, naaonjoaineein acaauruhacha curuaateihu. ⁹Nichata janohin cataan uujue banate acaauru jaberoco coaraa cuurureein araai laurii nenacaauru, coriaae caje unacaauru, lauriu lauriu nichao que ichaohin nere que ereein nenacaauru cachaaauru, naaonjoainuri. Nete, acaauru jaberoco conatecuruhane caohatererein. ¹⁰Nii nainihate jataain rachoojoeurureein caa chauratane que nenacaauru cachaaauru, ooruhanaa nii coroatajai Cana Coaunera ere beebejeeurerana jaun. Nitohaneeinte rachoojoein beseta ichaain ita belaiha cuurureein itolere nijihanai que, jataain acaauru cairichaeranuneein aihuruhaa nii coroatajai Cana Coaunera ere beebejeeurera rautaaurenihane jana, inae atinanohineeauruhane jaun.

¹¹Nete coaiteen nichata janohin cataan uujue bana acaauru ichatiha Cana Coaunerana jaun ichanaain nimichucuruhane coaraain jataain casihure satiiin nii acaauru coaraaauru cachaaauru. ¹²Nii catiaaeriinte, dedeeu mijiaaineein toniha erena jana, “Chajaauchete ini,” naain toniha nii erenaane aonacure nii coroatajai Cana Coaunera ere beebejeeurera. Niritoha nii erenaane aonaainte nii acaauru que nejeratenacaauru notaracaa dede sacari aina cuhin dedeeu inih cuure. ¹³Nii rijieeoritiinte uha carora tabaine jaun comoe nii nese neleru lechoocaniu nenacaauru lorerichurune jana, oorureein caainsi oaraancani cachaaauru. Nii jana acaauru caute- ecu nedana-caauru cachaaaurute nesoone caaun Cana Coaunera coroaecurureein.

¹⁴Nitohaneeinte situe nii necairichanaa tabai coroataja. Nete nii baiha coaiteen ureein necairichanaa nichatajanu.

Toroonfeta totiha anjera necaainsinene

¹⁵Nii baiha, toroonfeta totiha nii
 anjeraauru caainsinene janate,
 mijiaaíneen dede que toniin:

“Caa chauratanete
 Cana Coaunera aina rai Calaoíhi
 Jesocurisito raineen nihane jaun,
 acaauruhacha satonoreen tiaain caa
 chauruatane Curuanaaneen
 neroranereen,”

naaure. ¹⁶Nii jana, nii coroata choonca
 jenaain rai rori ichoae Cana Coaunera
 acatiha neen laurujualaaurujuanacaauru
 ichauhenaaurute neseenraain atane
 que tiaain nenorocoaain:

¹⁷“Íi, nunuhe caje coaaneen satono
 que tiaan
 itolere Coauneraneen-
 itolere ichana naineraneen neeine
 coroaecaanura Cana Coaunera.
 Íite ichaohin itolere janonaa bana
 neen
 itolere que laraajiin chabana
 satonoelanaala
 Curuanaaneen neeine
 nunuheteei inae.

¹⁸Íi ainate níqui obaaecure
 caa chauruatane que nenacaauru íi
 coitucuhichuru.
 Nete inae turue acaauru
 cairichaaíne jaan cojoanonaa.
 Inae turuha onacaauru rucuequine
 jaan cojoanonaa.
 Íi letonocuru- íi ere beebejeein
 amuhemuhenacaauru
profetacurute
 coroatajaniha curiquiin;
 acaauru íi cachaneen íi jereeine
 rijijieein neeuruhane jaun.
 Inae íi sacuurera coroatajaniha
 curiquiin,

itolere canaanaihuru, ichauhe-
 naauru, naaonjoaain.
 Nitohaneeite
 itolere caa chauratane que
 nenacaauru itajeraneen nena
 itajeriquiin,”

naain Cana Coaunera coasitaaure.

¹⁹Nii janate, neyoracae dedeeu Cana
 Coaunera coroaecuruhane jaan
 coloheri Teenforone jana ecu
 inanacaain ne Cana Coaunera rai rauhi
 curu camela. Nii janate dede caje
 ococoe jiacanocuru, tonijiaínunri,
 araracuru, caroracuru, jelajinaa
 jaberocooru, naaonjoainuri.

Leinjiin ene aina leinjiin ataebinae *dragon*

12 ¹Nii janate dede que ecooca
 leinjiin cana dede cojunacane
 jana, inanacae leinjiin ene- enoto que
 conaanojineen que cajioneconaa
 rijijieein- rai tíjia asaae atene siriin,
 leinjiin comai lechoonca coroatajai
 arasíjje siricha lauhecaain. ²Nii enete
 canaanai cosuriu nihane jaun janoanaa
 jereen cuna caaun necairichajeein
 auhauhaque. ³Nii catiaaeriinte coaiteen
 ecooca cana dede cojunacane jana
 inanacae leinjiin ataebinae- *dragon*
 lanajai tasinojoain- caainsinei couturiin
 lechoonca jichohin. Satiin nii caainsinei
 couturi nainetiinte ne rai comai. ⁴Niite
 rai nuseei que dede nichata neleru caje
 arasíjjeuru joae chauratane ichoae. Nii
 ataebinae- *dragonte* ococoe nii ene rene,
 nii beree nejanoaneni quíha nejanoíha
 rijieeoritiinne coina. ⁵Nii janate, inae
 quícha cojoaajiíneen nejanoae nii ene
 beree. Aca satiin chauratane que lauri
 lauri nenacaauru curaanaa nihane
 coina- coata caje nena otiha que bíjje
 achunequiin. Nete inae nejanoa
 rijieeoritiin nii beree raain amaure
 Cana Coaunera aina rai rori acatiha.

⁶Nii jaaunte, neniha cachane jaan cuhin soroe que banihateein Cana Coauneraacha rucujueihu cuhin nii ene, ecu teein beraichateein coroaaterate le oaraanca coroata fasha saota choonca janoihin Cana Coaunera.

⁷Nii baihate, nii dedeeu ita soore nii tabai ataebinae- *dragon* aina, Miqueli aina rai anjeraauru. ⁸Nitohaneein ita sooruha nii tabai ataebinae ainane janate, acaauru amuritonaa nainesihurene nii ataebinae rai anjeraauru. Nii jaaunte, inae dede que nenea nainecurene nii tabai ataebinae aina rai anjeraauru. ⁹Nitohaneeinte, nii ataebinae- *dragon* tabai jaaore dede caje. Nii ataebinae- *dragonte* inoaenlu caje coauneein nenea acano tabai inoaensi- Moconajaera ne. Acate satiin chauratane tinonoritiin cacha coritaeranein ne. Acate, nii rai anjeraauru aina jiniiquin chauratane que jaonojoinecure.

¹⁰Nii janane dedeeu mijiaaenein toniin:

“Inae ichoteratenojoi niha cachane jaan cojoanonaa que turuha. Niicha ichana nainei ichaain itolere curuanaa neein niha Cana Coaunera aina cocoainanacai niha Mesihassine jaan cojoanonaa quete inae turue. Inae Cana Coaunera sacuurera coulurujuera Moconajaera jaaoruha. Acate acaauru coulurujuue, jiichoo, janotiin, itolere cojoanonaa bana, naonjoaain Cana Coaunera acatiha neein. ¹¹Cana Coaunera coreniha cana nejeranein nenacaaurute cana osa coreniha atinanojoineein nenea Cana Coaunera Calaohi coichana aina, niicha beratei acaauruacha beebejeei, naonjoainuri aina cuaain inae amuritoore. Nitohaneeinte Cana Coaunera ere beebeejeeuruhane coreniha coasilanaala ooruhane coina jatoroaain neein aihure.

¹²Rachoojoeuche dedeeu neiniqichene. Jana, chauratane que nenacaauru, cana temurau- cucuana cuhane nenacaauru, naonjoaainunrite jataain cairichaaajoaure, inae ichuunnijia necairichanaa coaraane cojoanonaa que turuhane que nainaane jaun, acaauru rene fauha cuha jataain obajeein Moconajaerane jaun,” naane jana aonajeeun.

¹³Chauratane choaae jaonojoinihane que nainacoriin, nii ene canaanai janoaera coinetein soha cue nii nechu aansai ataebinae. ¹⁴Nii janate, nii ene itaro jaaure tasionjoaain ujuiri tabai itaro tocohaneein, coriaae cuhin nii acano inoaensi caje soroha neniha cachane jaaun cuhine coina. Ecu teeinte, nii ene coroaateure nichata jaanacai cataaun reein tiaain. ¹⁵Nii acano inoaensite nujaue caje acau mitaain nucuhe jae, raotojoein nii ene sohin jaohane coina. ¹⁶Nete, nii ene coroaatane chauratane, nujaue caje acau jaohin nucuhe jaa nii ataebinae tabai- *dragonne* jana lichurujuaaaitiin jacolohitiin. ¹⁷Nii jaaunte, jataain nii ene cotaain coraje nii ataebinae- *dragon*. Nii jaaunte cuhin, nii eneecha foerateeuri aina rai bereecuru, satiin Cana Coaunera ere tonoraain Jesoso cachanein neeuruhane beeuruhane que casilanaala nenacaauru, naonjoainuri soha cue nii ataebinae tabai.

Coroatajai ataebinae tabai

13 ¹Nii janane caainsine couturiin, le choonca jichohin, naajoaain cucuana caje mituhin iniha uha leinjiin ataebinae tabaine jana coaraaun. Le jichoore nainein niha comaine janate, Cana Coaunera baijiaraanu rijitiin couturichuru nainein laenanohinein ne erenaa. ²Nii ataebinae tabai canuhacha coaraite, leinjiin aain

tocohanein acomari tijia tocohane rai tijia. Nii jana rai nujuaante, aain tocohanein nenea leon ujuaae tocohane. Nii leeocho ataebinae- *dragonte*, nii aain tocohanein nenea rai, jataain nelatein nihane jaane maajeein rai tein cocoainaain, nelaurianaja rorine maajeein rai te. ³Nii aain tocohanein nenea ataebinae couturi leinjiinte, ohane coina ichanohin tocohanein jataain temuhin cunaitanohi ne. Nete nii rijijieein coichanojineei nerautaa nii necoasa-jane coaracuruhane jaun, jataain cojoelatiin coaraain, nii janolari tocohanein nenea ataebinae tabai esenetaain sacuure, satiin chauratane sacuritaain nenacaauru cachaauru. ⁴Nii jaunte, nii aain tocohanein nenea cocoainaai nii leeocho ataebinae- *dragonne* jaun, acaneein neeuruhane coroaecure, “Cha caa leinjiin ataebinae tabai- aain tocohanein nenea amuritona naine. Nihei chuni amuritona nainera,” naain acaneein niha nii aain tocohanein nenea ataebinae tabaine coroaecure, nii leeocho aina curuaecaain.

⁵Chaen techu, Cana Coaunera baijiaraanu rijitiin, itolere que nelaetoha nocoetiin iriha nii janolari tocohanein nenea ataebinae tabaine jereein, jena choonca coroata ateein cocoaina nacaineein nihane coina cocoainaai nii leeocho ataebinae- *dragon*. ⁶Nitohaneinte, Cana Coaunera baijiaraanu rijitiin que nejeratein, rai nenaja *santuario* quene maajeein ereein, dedeu nenacaauru quene maajeein nejerate. ⁷Chaen techu nii ichoae tacaain, coaiten nii leeocho ataebinae cocoainaai nii *dragon*. Cana Coaunera cachaneein nenacaauru que nejeratein, acaauru amuritohane reentiaain sonaana que nihane jereein, lauri lauri nichao que ichahin, lauri lauri nere

que ereein, lauri lauri natane que ichahin, naaonjoainuri curuaanaaneein nihane coina cocoainaai. ⁸Nii janolari tocohanein nenea ataebinae coroaeraaurute, satiin caa chauratane que ichoteratenojoina lanaala nacaauru cachaauru neeure. Coatiha laenanohi-nihei acaauru curuaa nii necoaaunaalu chauratanene caje coaauneein nichotee-neuri curuaacuru siriin nenea quiricha cuhane. Nii quirichate cana coreniha sohin jaonojoin Carenero Narejeen rai nichoteeneuri curuaa cocoiricha ne.

⁹Chunocoha aonana naineraauru aonacurumiin:

¹⁰Caresero cuhane neeuruhane coina nenacaaurute, caresero cuhane amanojoinecurureein.

Jana sabere que sohin jaonojoinecuruhane coina neeninurute sabere que sohin joaeracurureein.

Caute coarareein esinae rauhijiriin itolere que laraajiin, niicha esenetai esenetaauruha Cana Coaunera cachaneein nenacaaurune.

¹¹Nii baihane, atane caje iniha cuha leinjiin ataebinae tabaine jana coaraaun. Nii jana rai jichote carenero narejeen jicho tocohanein corootajae. Nete nii leinjiin ataebinae- *dragon* tabai rijitiin ere. ¹²Acate nii jauriaanejeein nenea ataebinae tabai rijijieein jataain cocoinanohineein ne, nii jauriaanejeein nenea acatiha neein. Nii jaunte, nii jauriaanejeein nenea ataebinae tabai-temuhin cunaitanohin couturii-coroaecuruha satiin caa chauratane que nenacaauru cachaaurune coinane maajeein ichae. ¹³Chaen techu, satiin cachaauru notaracae itolere cojoelanaa-cojoai ichaain, dede caje atane choaae usine maajeein nalutiae. ¹⁴Nii jauriaanejeein nenea ataebinae tabai notaracae

cojoaelanaacojoai ichaane aina
cuaainte, caa chauratane que
nenacaauru cachaauru coritaain-
acaauru que nii sabere que temuhin
cunaitanohin niha natiin ichaohin
nenea ataebinae tocohaneein ecaanto
jaerate. ¹⁵Nii ataebinae tocohaneein
niicha ichacuri ecaanto rai ichaonaa
teeinte erelate nii ataebinae tabai
coroataja. Nii jaunte, satiin corojela-
naala nenacaauru cachaauru sohin
joerate nii ecaanto acaauruhacha ichai.
¹⁶Nii choae tacaain techu, satiin
canaanaihuru, ichauhenaauru,
coriquihonacaauru, cairichaihuru,
letononeein nenacaauru, letononela-
naala nenacaauru, naaonjoainuri, biji
raotono nichajai que, acaauru auri que,
naaonjoaaine maajeein rai cachaneein
neeuruhane coujunacaneein acaauru
coujunacaterate. ¹⁷Nitohanihane jana
coaracaauune janate, chuni nii
ataebinae curuaa aina rai coujunaca
sirilanaala nenea, nii chaelai coreteein,
chaelai que necoreteein, naaonjoana
nainecurene.

¹⁸Caute laen coaarareein itolere
coitucuurera. Coitucuerate, nii
ataebinae coujunaca janijiiin coitucu-
reein. Nii ataebinae coujunacate, cache
coujunaca rijijieein ne. Acate, saota
fasha saota choonca saotaneineein ne.

Nenatecuruha le fasha jena choonca jena oaraancai cachaaaurune

14 ¹Nii baiha, Sioon bichatane
ucuuno ichoae chujuhechoa
Cana Coaunera rai Carenero Narejeene
jana coaracaauune janate, ecu rai nauri
que Carenero Narejeen- atinanohineein
nenaalu curuaa aina rai Inaca curuaa
siriin ecu aina neeure le fasha jena
choonca jena oaraancaain cachaauru.

²Nii janane, caraturi caje naluha acaune
rijitiin, toniha ararane rijitiin,

naaonjoaain jataain mijiaaaineein toniha
dedeeune jana aonaun. Aonacaaunne
janate, arajii quitara rijijieein nenea
arafa toteeuruha arajiin cachaaaurune
rijitiin netonijiae. ³Nitohaneein
netonijiaainte ena nenea nenatena que
nenatecure, nii rori caohacha ichoae
nenea, chaen nii cache tocorijianein
jenaain nenacaauru, chaen nii ichauhe-
naauru, naaonjoainuri acatiha neein.
Nihei nii chuni, nii nenatena que
nenatena nainera. Acaihaniji caa atane
caje le fasha jena chonca jena oaraan-
caain ichoteratenojieein nenacaau-
ruhachate, nenatena naine nii nenatena
que. ⁴Acaaurute, chabana suujua
corelanaala niheichu nii chuni acaauru
suujua corera tonoraelanaala neein-
cunaa jerihane jaaun cuha nii Carenero
Narejeene jiniichaain amuhemujeein
neeurure. Niichurute, satiin cachaneein
neinichaachene caje ichoaichaniha
ichoteratenojieein nii Carenero
Narejeen aina Cana Coaunera belaiha
tenojieein neeure. ⁵Acaaurute, nii
chariji bana casaje ujuaihonelanaala-
niheichu baasoneein ereein,
naaonjoaain neeurene.

Nichatajai Cana Coaunera letono anjera benojoin

⁶Nii janane dede catai jeloone
jiaauluhin situha uha leinjiin anjera, nii
chariji bana satonoelanaala nenea
beratenojoin erenaa biha uha, lauri
lauri natane siriin nenacaauru, lauri
lauri nichao que ichaonacaauru, lauri
lauri nere que ereein nenacaauru, lauri
lauri nenaja que nenacaauru,
naaonjoainuri raine jana coaraaun.
⁷Nitohaneein jiaauluhin situhinte:
“Baaso ichara casetecaera niha Cana
Coaunerane coitucuhin Cana Coaunera
coroacuche. Inae caohacha ichaeneei-
chene, baaso ichaquichene coitucuhane

jaa cojoanonaa que inae turuha. Cana rai dede, chauratane, cucuana, atane suujua caje nalunaa acau, naaonjoainuri coauneraneein nenea Cana Coaunera coroaecuche,” nae tonijiaain ehequiin.

⁸Nii baihate coaiteen caaijie uhe rai coroataja- leeocho anjera. Nitohaneein uhinte: “Inae nitajeeuruha Babilonia cocoaichacuru, nechú joaereein jataain baasoneein ichaoha cachane coina ichao ajaelaera que sathi chauratane lauri laurii ichaonacaauru cachaauru ichao ajaelae ajaelajeein nerejetilu,” nae nii anjera coroataja.

⁹Nii baihate coaiteen caaijie uhe rai nichataja leeocho anjera. Acate: “Chunocoha nii ataebinae tabai corojeein nii tocohanein nenea ecaantone maajeein corojeein, rai nauri, biji, naaonjoain que cojunaca sirichate, ¹⁰obajeein nitohanai icharaauru caseteco coaracuruhane coina acaauru que banihatein Cana Coauneraacha rucujei bino que cocohin, asojeere tocohanein moconaa usi tabai jana mocoorureein, Cana Coaunera rai anjeraauru, rai Carenero Narejeen, naaonjoainuri acatiha netiin. ¹¹Nii chariji bana satonoelanaalate itolere janonaa bana mococho cuurureein, janotiin, jiichoo, naaonjoaain nii ataebinae corojeein, nii tocohanein nenea ecaantone maajeein corojeein, rai curuaa cojunacane maajeein sirichaauru,” nae ehequiin nii anjeraauru nichataja.

¹²Enate laen itolere que laraajii neeuruha Cana Coaunera cachanein nenacaauru, nere tonoraain itolere bana jianelanaala jeriha Jesusone rijijieein ichaauruhane necoharareein.

¹³Nii jana aonacaaunne janate:

“Aonaain laenaau: Nerausiaecate cuurureein ena caje coaunein nunuheetein Cana Coaunera esenetaain

ooruhane que tiaaajoaain nere tonoraain ichaonacaauru,” naain toniha dedeeune jana:

“Aihachuhisicha. Acaaurute nebeta-caaurureein namihaneon caje. Canune acaauru que acaauru amihaneon coaratereeeunni,” naain tonorae Cana Coaunera Suujue.

Caa chauratane que nenacaauru taojiaera

¹⁴Nii jana coaracaunne janate, dede sacari jana lajuuae leinjiin cacha tocohanein nenea- coturi que oro caje ichanohin comai siriin- sabere ajihanti que biji achunequiin. ¹⁵Nii janate Teenforo asajai caje mitatiin: “Chajaain nii taojiaaine jaanu que iicha amai que-nii iicha raaeninuru taojiaain ranajaau, inae cataa caa iicha raaeninuru- caa chauratane que nenea- inae rai cojoanonaa que turuhane jaun,” naain eheque nii leeocho anjera, dede sacari jana lajuuai rai. ¹⁶Nii jaunte, nii niicha amai sabere que niicha raaeninuru taojiaain, caa chauratane caje ranajae nii dede sacari jana lajuuai.

¹⁷Nii baihate coaiteen dedeeu nenea Teenforo caje mitue leeocho anjera- acaantonai sabere ajinaai que biji achunequiin. ¹⁸Nii janate Cana Coaunera belaihuruhane jaa rori caje mitatiin: “Chajaain nii ii sabere que nii chauratane que nenea oba inaa saau. Inae cataa nii oba inaacuru,” naain ehequiin nii sabere que biji achunequiin nenea cotijiae, nii leeocho anjera- usi curuaanaa.

¹⁹Nii jaunte, sabere que nii chauratane que nenea oba taain, raain, rucuhane jaa cuhane te, ecu tein oba baca rocohane coina. Nii oba tainaate inae caseteco tabai letoaa Cana Coaunerane beraneein ainaa ne. ²⁰Nitohanein nii rucuhacuruhane jaan cuhane rucujeein, nese udaa nii oba baca rocooruhane

janate, ichananeein mituhin nichata fasha oaraanca metoroneein jelaai joJoe cabario ujuaae ucuunejeein ucuacaain.

Caaunsine anjeraaauru- caainsii laurinei itolere necairichanaa satono uhaaurera

15 ¹Nii jana dede coaracaaunne janate que ococoe jataain coJoe-lanaacojoai- coaara caina ecotenojoin tasionjoaain. Nii janate, ecu neeure caainsiineein anjeraaauru, itolere necairichanaa que cacha cairichaeranu uhaain. Nii quete, jataain nobaaeneein niicha coacui satonote Cana Coaunera.

²Nii jana cucuana baca coaracaaunne janate, usi que jasisii tocohaneein ajarotiin ne. Nii cucuana baca tocohaneein ajarotiin nena auhanihate, acaauru rai Cana Coauneraacha tei quitara rijijieein nena arafa sijiarisiin neeure arajiin cachaauru, nii atabinae tabai, chaen nii tocohaneein nena ecaanto, chaen nii coujunaca aina curuaa, naaonjoainuri amuritooreraauru cachaauru. ³Acaaurute, Cana Coaunera ere bera inoansi Moisesa nenate que nenatecure. Chaen Cana Coaunera rai Carenero Narejeen naaonjoainuri nenate que nenateeinte:

“Jataainte, coJoe-lanaacojoaain janiinacajelanaala itolere que laraajiin, esinae rauhijiriin aitoHine rijijieein caohacha ichaaicha Cana Coaunera.

Iite, satiin lauri lauri rai natane que ichaonacaauru cachaauru curuaanaa Reyneein neeicha.

⁴Nihei nii chuni ii que suujua acatelanaala naineijeita Curuaanaa. Neiheichu nii chuni ii coraajelanaala nainejei.

Nii jaunte, leinjiin iicha saantoneein neeine jaun, satiin lauri lauri rai

natane que ichaonacaauru cachaauru ii coraocurureein, itolere baaso, caohacha, naaonjoain ichaain coarateeeine jaaura,”

naain nenatecure.

⁵Nii baiha nojoracaa dedene jana coaracaaunne janate, ecu niha acaauru aina niicha ichaneni ichaane caina Cana Coauneraacha icharatei Teenforone jana, ecu ne Cana Coauneraacha turunajaanu jeelai *santuuario*. ⁶Nii Cana Coaunera turunajaanu jeelai cajete mituure caainsiineein anjeraaauru, itolere caainsii laurini que cacha cairichaeranu amaa cunacaauru. Cajione somaratiin jiquihaqui que cajionecohin, jaleri cataaun ooJoeaain oro caje ichanohin siintoroon que siintorooncohin.

⁷Nii cacha tocorijianein ichaohin jenaain nenacaauru caje leinjiinte, nii caainsiinein nenacaauru anjeraaauru rai, oro caje ichanohin cocoornajaan curu nainocoJoeaain casetecocuru que banijiaain nena- nii chariji bana satonoelanaala nena Cana Coaunera caje unaa te le anjeraaauru nainetiin. ⁸Nitohaneinte, itolere que laraajiin necaohacha que necaohachaane coaratiha Cana Coauneraane jaan-suruua caaun nocoJoe nii Cana Coaunera turunajaan- *santuuario*. Nii jaunte, nii chuni ecu turunaa nainene, nii caainsii laurinei que cacha cairichae-ranu jitariin berotecuruha nii amaau-raauru caainsiini anjeraaurune reen tiaain.

Casetecocuruhacha coheni curu muruaae

16 ¹Nii janane nii Cana Coaunera turunaja *santuuario* tonii: “Chajaaain nii casetecocuru que baniha-teen Cana Coauneraacha tei caainsii

curuneein nenea- muruaae cuhane nenea chorocuche chauratane ichoe,” naa tonijiaain nii caainsiini anjeraauro rai erenaane jana aonaaun. ²Nii janate, nii curu muruaae cuhane nenea necairichanaa tera choroha leinjiin anjera chauratane ichoane jana, ataebinae cojunaca siriin nii tocohaneen nenea ecaantone maajeein corojeein nenacaauru cachaauro jaberoco que cunaain mitue abero jataain tasionjoaain.

³Nii janate, cucuana cuhane leeocho curu muruaae cuhane nenea necairichanaa tera choroha nii anjera coroatajane jana, ichana nejesinaneen nerotoe cucuana baca esinaeaca, sonajaain jaoha cachane aihane tocohaneene jaun satiin oore nii cucuana cuhane ichaohin nenacaauru.

⁴Nitohaneente, nucuhe cuhane, atane jachu caje acau nalunajaaunru cuhane, naonjoaain nii necairichanaa tera choroha nii curu muruaae caje anjeraauro nichatajane jana, ichana nejesinaneen nerotocure nii nucuhe bacaauro esinaeacaauru. ⁵Nii catiariin aonacaanne janate:

“Iite, esinae rauhijiriin nitohaneen caohacha aina baaso icharaauro coaraain casetecaraneen neei.

Iite Cana Coauneraneen acaihanejei Saantoneen inoanlu caje coauneein neei.

Chaen techu, nii chariji bana satonoelanaala neriquiin.

⁶Acaaurute ii cachaauro sohin jaohin ii ere beebejeraneen nenea *profetacurune* maajeein sohin jaorelu.

Nii jaunte, nii niicha sohin niicha jaaorilu coichana que cocooruhane coina

acaauro cairichaa ichaai, baasoneen ichaauruhane jaun. Nitohaneen terate latecure,”

nae nii nucuhe bacaauro esinaeaca asaaecane coina que banijiaain nenea Cana Coaunera rai anjera.

⁷Nii janate, Cana Coaunera rai jujuai mocooruhane jaan rori rohan toniin: “Aichuhisi laesinaera, itolere ichana naineraneen neeine jaunra Cana Coaunera, esinae rauhijiriin nii baaso ichaelanaala nenacaauru casetecaelanaala, baaso icharaneen nenacaauru casetecaraneen neeine jaunra,” naane jana aonaaun.

⁸Nii janate, nii niicha amai muruaae conera chohitoha enoto ichoe nii anjeraauro nejenane jana, nii aina cuaain niicha ichana naine ichaain cachaauro mocoe najaano que nii enoto cono. ⁹Nii jaunte, jataain banejelanaala mocoore. Nete nitohaneen mainajeein mocoorua natiin, Cana Coaunera coroaena coacuelanaala baijiaraanu rijitiinchuru jataain baasoneen que ereure, nii itolere cunaihuru amurijiriin niicha ichana nainei icharaneen niha Cana Coauneraneen saijeein.

¹⁰Nii jana, nii niicha amai muruaae conera chohitoha nii ataebinae nelauria- najan rori ichoe nii anjeraauro nesaoquine janate, jataain caohacha nocohenaneen nedae rai cojoanonaa.

Nii jaunte, nii mocooruhane curiha cuna caaun lele calaure cachaauro.

¹¹Nete nitohaneeuruha natiin, nii baaso ichacuruhane jianelanaala, nii acaauru abero aina acaauru moco curihuruha natiin, Cana Coaunera que nejerateen baijiaraanu rijitiin ereure.

¹²Nii jana, nucuhe Eofarate cuhane nii niicha amai muruaae conera chohitoha anjera nesaotane janate, jera jaonaa nainecuruha enoto mitu nichajai caje unacaauru *reychurune* coina jacoroe nii nucuhe baca.

¹³Nii janane, nii ataebinae tabai- *dragon* ujuae caje, chaen nii necha

aansai ataebinae tabai caje, chaen nii *profeta* niha nocoeti, naaonjoainuri ujuae caje mituha dari tocorijianein nichatajaain nechu coitucuchuhi suujuene jana coaraaun. ¹⁴Acaaurute nii nichatajai coitucuchuhi suujuenein itolere cojoelanaacojoai ichaain, satiin chauratane sacuritaain rai cachanein nenacaauru *reychuru* taojiaain sonaana que niha uurureein, inae itolere ichana nainera Cana Coaunera Cojoanonaa que turuhane bana.

¹⁵“Aonacuche, nii nainajeneeichene janane aiha leinjiin asijiautone rijijieein inara rene luhecotariin neeoritoreeuni. Jataainte nerausiaeca cureein caohachaaain nainaaain letona jatoraaain cajione ruhecaain canu cohara, nabana machoharohane, nii machoharohane que coejeen cacha cataaun nihane coataa,” nae Cana Coaunera.

¹⁶Nitohaneente, nii nere cuhane Armajedoonnein Ebereocuruhacha curuaatei ita taojiaaure- nii satiin chauratane sacuritaain nenacaauru *reychuru*.

¹⁷Nii janate, joaereein nii curu muruae cuhane nenea cabuhitoha nii anjera caainsiinene jana: “Inae jatoroaa,” naain tonijiaain toni erenaa dedeeu nenea Cana Coaunera turunaja *santuario*- nii nelaurianaja rorihu toniin.

¹⁸Nii janate, jataain mijiaaínein niha jiaacanone jana, jataain mijiaaínein toni erenaa arara aina. Nii janate jataain mijiaaínein luhecotariin uha carorane jana, jataain mijiaaínein nerurujuae atane, niha caa chauratane que cachaaurune jaan caje coaaunein niha leeocho caroracurune amurijiriin jataain mijiaaínein uhane jaun. ¹⁹Nii janate, mijiaaínein uha carorane jana nichata turiin nefaruhe Babilonia nese tabai. Nii jana nefaaruusiha satiin chauratane

sacuritaain nenacaauru neseeurune janate, nii Babilonia nese tabai coacue Cana Coaunera, nii nobaaenein casetecocuru cocoaane coina niicha rucujuei bino elonai que acaauru cocoaane coina. ²⁰Nii jana satiin obenecuru, ichatane ucuunooru, naaonjoainurite nefaruusiin nitajihane jana, ²¹dede caje cachaauru ichoae naluhacoae ajeri jaberoco rijijieein nenea- jelajinaa jaberoco jeenachoonca quiro amurijiriin anajiin. Nii jaunte, acaauru ichoae nichoroha dede caje uhin nii ajeri jaberoco rijijieein nenea- jelajinaa jaberococone jaun, jataain necarichanaa tabai caseteco nihane jaun, Cana Coaunera que nejerateein baijiaraanu rijitiin ereeure cachaauru.

Jataain ene cojoaeloroheri esinenenein nenea casetecaauruhane

17 ¹Nii caainsii laurinei cacha cairichaeranu curu muruaae amaaurea caainsiini anjeraauru caje leinjiinte: “Chajaaune, naaonjoain casetecanohinerichaaain taa cucuana baca ichoae lauhequi ene cojoaelo-rohene coarate ii que. ²Caa chauratane curuanaa *reychurute*, taa ene cojoaelo-roheri aina ichaojeraquín neeure. Chabana nitohanai ichaain ichaonaa naineniha cachane saijieein, rai nichao baaso aina cuaain satiin chauratane que nenacaauru ichao aasajeein osa que sarunajaelu,” nae canu rai nii anjera.

³Nii baihate, Cana Coaunera Suujue coaratenojoin coaracaaunne jana, cacha areroco canu amae nii anjera. Nii janate, ecu niha leinjiin ataebinae tasionjoaain lanajaaíne jana, nichoae lajuae leinjiin ene. Nii ataebinae tabaite, Cana Coaunera baijiaraanu rijitiin jaberoco sacuritaain laenanohínein rai curuaa siriin, caainsiine couturiin lechooncae rai

jicho. ⁴Nii jana nii ene cajionete, lanajaain jichohajiojoai que jasisiin, oro caje ichanohin que corujuelequiin, jataain coretiin nenea ajeri jaberoco que urerianohinein, jiquihaquiin nenea perla, naaonjoainuri que urerianohine rai cajione. Oro caje ichanohin acau cooruhane jaa curu muruaae que biji achunecohin, nainecojoaain rautaaain coanacaaajoaelanaala nenea siri, nechujataain leinjiin calani dadana-caaajoaelanaala nenea amae nechujoaenreein cachaauru que ichaojera-quiin neosateein nihane jaun.

⁵Nitohaneeinte: “Babilonia nese tabai, ene cojoaeloroherihuru nebanein satiin chauratane sacutaain itolere cachaa-ruhacha rautaaai icharanein nenea,” naain laenanohinein curuaa siri nauri que, chabana coaraa nitohanaine que airijiin.

⁶Nii baihane nainaaun, Cana Coanera cachanein rai nere beebeje-raneein neeuruhane coreniha, chaen Jesocurisito beebejeeuruhane coreniha atenanohinein nenacaurulu, naaonjoainuri coichana caaun ajiha nii ene cojoaeloroherine que. Nii jaunne coarihanune rijijieein jataain cojoelatoon.

⁷Nii jaunte canu rai: “Chanuna jataain cojoelatohi. Tane ichai caa ene ichao coitucueraelanaala nenea aina nii caainsiinei couturiin lechoonca jichohin- nii amaera ataebinae tabai, naaonjoainuri beete coitucuhi. ⁸Inoaulute niqui ichoaelu nii iicha coarai necha aansai ataebinae tabai, nete inae nitaje. Nii jaunte, caohacha nitajeeriin nitajesihane ajiniha, nii chariji bana satonoelanaala nenea atane jachu caje inicheein. Nii necoaanaa cana rai chauratanene jaa caje coaaunein Cana Coanera coitucuurera curuaacuru siricha quiricha cuhane laenanohinein

curuaa sirilanaala caa chauratane que nenacaauru cachaaaurute, nii necha aansai ataebinae tabai cojoelatiin coaraa cuurureein, inoaulu ichaohalu natiin inae nitajihane jaun. Nete inae nacooaunein ichaoreein.

⁹Caute laen esinae rauhijiriin coaareein niicha coitucui coitucuhin biha coitucuerane. Nii caainsiinei couturiite, caainsiinei ichatane ucuuno nii lauhaca ene cojoaeloroherine jaan beranein aihane. Chaen nii caainsiinei couturichurute nii caainsiinei *reychuru* beranein ainaa ne. ¹⁰Nii saokuui *reychurute* inae chaque nelateein nedaaurene. Leinjiinchate jaiti itolere curuaanaanein ne. Nii jana leeoate jaiti turuene. Nii acauru caaijie nedanaa turuhenein inae turuhane bana coatiha carajaain nerinaain. ¹¹Nii inoaulu ichaonaa necha aansai ataebinaete, acauru curuaanaa *reyn*eein acauru fosaneinein nelu. Nete inae nitaje. Nii choae tacaain techu, nii caainsiinein nenacaauru caje nenea nelu. Nitohaneeinte, jataain caohachanainejeein raajenihane itajeranu ichajeein sacue.

¹²Nii lechooncaain jicho iicha coaraite, lechooncai *reychuru* neein jaiti curuaanaanein cocoainanohi nelanaala nenacaauru ne. Nete inae carajaelanaala, nii necha aansai ataebinae jiniichaaain aihuruha *reychurune* rijijieein cocoainanohi neeurureein. ¹³Nii lechooncai *reychurute*, ita suujua rijitoejin niicha ichana nainei ichaa nii necha aansai ataebinae tabaine coina cocoainaa cuurureein. ¹⁴Nitohaneeinte, nii Carenero Narejeen aina ita soha cuurureein. Nete acauru amuritoa cureein nii Carenero Narejeen. Nii suujua rijijieein janijiin Cana Coanera ranojoinurilu rai cachanein nenacaauru aina, satiin

curuaanaacuru curuaanaa neein, satiin reychuru rai Reyneen niha nii Carenero Narejeenne jaun,” nae carai nii anjera.

¹⁵Chaen techu canu rai: “Nii lauhaca nii ene cojoaelorohérine jaan- iicha coarai acaute, nenaanaja, cachaauru, nere que ereein nenacaauru, natane que ichaohin nenacaauru, naaonjoainuri beraneen ainaa ne. ¹⁶Jana nii necha aansai ataebinae tabai jicho lechoon-caain iicha coaracurite, nii ene cojoaelo-roheri que nejerateein, machorocoain que jaolecohin, rai jaberoco quini usihanau mocoourichaaaine jaan beraneen ainaa ne. ¹⁷Cana Coaunerate, acaauru suujua jichochoe, aca jerihane rijijieein niicha jerei ichaain, jiniiquin ita suujua rijitojoein, nii reyneen cocoainanohineen neeuruhane jaan teeuruha nii necha aansai ataebinae raine coina. Nitohaneen jeriha Cana Coaunerane que tihane jaan que tiaajeein. ¹⁸Nii ene iicha coaraite, itolere amurijiriin nena Babilonia nese que satiin chauratane sacuritaain nenacaauru reychuru amuritoeraneen nena beraneen ainaa ne,” nae carai nii anjera.

Nitajiha Babilonia nesene

18 ¹Nii baihan niicha ichana nainei ichaane coina cocoainanohineen, rai necaohacha que necaohachaa in dede caje fauhin chauratane jiliitoha rai cono necaohacha que leeocho anjerane jana coaraaun. ²Nii janate tonijiaain:

“Inae nitajiha itolere amurijiriin nena Babilonia nese tabai. Inae moconajaera nenajaneente, itolere lauri lauri coitucuhuhi que suujuequii, chaen rautaa in coaanacaaajoae lanaala nena itolere ataebinae

coitucuhuhi, tajaacuru coitucuhuhichuru, naaonjoainuri ucuhanee inae nerotoe.

³Nitohaniane jaunte, chabana nitohanai ichaain ichaonaa nainenih cachane saijieein, rai nichao baaso aina cuaain, satiin chauratane que nenacaauru cachaauru ichao aasajee in osa que sarunajaelu. Chaen techu, que ichao jeraquii nerejetocure satiin chauratane que nenacaauru curuaanaacuru. Chaen techu, satiin caa chauratane que necoretenacaauru coriquihocure, nech jataa in joareein baaso ichacuruhane jaanuhacha que necoretee in,”

nae carai nii anjera.

⁴Nii janate, nacoaauneen dedeeu tonii.

“Chajaain nii nese caje amuuche inara canu cachanequichene. Nabana nii osaaonacaauru aina neeichene acaauru osa leruhiche acaauru ainane, necairichaaiche nii necairichaaurohane jaan quene coataa.

⁵Dede quete turuhelalajee in lajuae jataa in acaauru osa tabai. Nii jana Cana Coaunerate, nii baaso chacuruhane coitucuhin chabana baitenereen.

⁶Leeochaauru cairichane amurijiri in, coroata saain jeelai amuritoheri in nii niicha coheni jataa in coaera i jasiitee in que cairichaa u.

⁷Jataa in necairichanaa tabai que cairichaa u,

leeochaauru cairichaane amuritohe-
riin.

Nechu jataain joareein nocohasitaa
nocoetohane jaunte,
rai suujua cuhane:

‘Caune aiha curuaanaane rijijieein
raotojoein neeun.

Coatiha aiha autanane rijijieein
necairichanaa coarinaauni,’
naain necohasitae.

⁸ Nii jaunte,

le jiichonijin cuhane nichaoe
nalureein itolere necairichanaa,
onaa, mijitena, nererojoecana,
naaonjoainuri.

Chaen techu

usihanau moconojoiniha cureein.

Jataain itolere que laraajiin niicha
ichana nainei ichaain

cha rucuharaniha nii casetecaera-
neen nenea Cana Coaunerane
jaun,”

naa erenaane jana aonaun.

⁹Inae moco caaun suruaa tabai niha
nii nesene coaracuruhanete, jataain
inaderaain chanaa cuurureein caa
chauratane que nenacaauru curuaanaa-
curu, nechu joanreein nichao aasajeein
nii nese aina ichaojeraconacaauru, nii
baaso ichacuruhane que netojoejeein.

¹⁰Nii jaunte, inae caseteconihane
coaracuruhane coasiha rohan nichuun-
tanaa nainelanaala caje coriae netiin:

“Jataainte cairichaaajoaai itolere
que laraajiin niha
nocoetohi natiin Babilonia nese
tabai, coatejeneine
jana luhecotariin ii rene turuha
casetecone jaun,”

naaurureein coarajeein.

¹¹Satiin chauratane sacuritaain ecu
necoretenacaauru techu, nii nese

coinaderaain chanaa cuurureein. Inae
nenerihani nii coroatajajelanaala
acaauruhacha sirii rucuhele coreterane
jaun. ¹²Nii itolere, oro, plata neein
curuajaain nenea coata coreti, ajeri
jataain caohatiin coreti, jataain cajione
caohacha, cajione lanaajionjoai, cajione
lanajai, itolere araai laurii enuha jujuhi
caje nenea, ebucu caje ichanohichuru
rucuheleeeuru, enuha jataain coretiin
nenea, coata lanajai boronce, leeocho
lauri coata, ajeri jaberoco jataain
nojoein nenea, ¹³arajiin jujuuain nenea
canera, sacari jujuuain nenea, miraa
chaen leeochoauru jujuuain nenacaauru,
perfume, bino, erene, arina caohacha,
tirico, atane choae terei anajiin
icharaauru, carenero, cabario, cabario
que tararaeraain nenacaauru, chaen
cachaauru letononeein nenacaauru,
naaonjoainuri que necoreteeuruha, nii
Babilonia cocoachacuru raine jaun,
jataain coinaderaaure. ¹⁴Nii janate
jataain inaderaain:

“Inae nihei iicha rautati rucuhele
coreti satiin iicha sirii.

Inae chabana nihei jerichanejeein
sirii neeine,”

naaurureein nii neseu necoretena-
caauru.

¹⁵Nii neseu necoretenacaaurute jataain
coriquihotiin neeure. Inae caseteco
coaraane janate, caje coriae neein coinade-
raain chanaain coarajeeurureein jataain
coasina caaun. Chaen techu jataain coisiin:

¹⁶ “Jataainte cairichaaajoaai, itolere
nese amurijiriin tabaain nenea.
Cajione caohacha que necoreteein,
lanajaain jichohajiojoai que
necoreteein oro,
chaen jataain coretiin nenea ajeri
jaberoco, perla, naaonjoainuri

que urerihanohin cajione que
necoreetiha leinjiin enene tocoha-
neei niqui.

- ¹⁷ Nete luhecotariin coacueneene
jana, inae nitaje nii itolere iicha
sirichuri,”

naaurureein.

Satiin bote cuhane curuaanaanein
nenacaauru curuaanaacuru cafitaan-
curu- cucuana cuhane amuhemuhena-
caauru, chaen marinerooru, satiin
cucuana cuhane nichao que ichaohin
raotojeein amuhemuhenacaauru,
naaonjoainurite coriae netiin
coarajeeure. ¹⁸Inae moco caaun suruua
niha, nii nesene coaraainte: “Coatiha
catohanein jataain leochaauru
amurijiriin jataain caohatiin nena nese
caa catohanein nedaai,” naure
tonijiaain.

¹⁹Chaen techu, coinaderaain
chanaain, couturi ichoae atane bujuinaa
chorohin:

“Jataainte cairichaaajoae taa nese
itolere amurijiriin nena, naain
chanaaurureein,
satiin nii cucuana cuhane bote sirii
amunacaauru,
nii nese aina cuaain coriquihona-
nein nedanacaauru.

- ²⁰ Nii nese cairichaa Cana Coaunerane
coroaecuche
dedeeu Cana Coaunera cachanein
janijiin niicha cotihanohinein
nenacaauru,
chaen afosotooru, *profetacuru*,
naaonjoainuri. Acaauru casete-
caane ucuatohate, inara rai
caohacha ichae Cana Coaunera,”

²¹Nii jaunte, nii itolere que nelateein,
niicha ichana nainera neein nena

anjera, nii leinjiin ajeri jaberoco
seonjoan- cha tutuuruhane jaa
tocohanein nena baihataain cucuana
cuhane siheitiin:

“Catohaneinte,
itolere amurijiriin nelaetiin niha
nocoetohinatiin,
inae chaque nelatelanaala neei
Babilonia nese. Inae chaelon
nihei nacoaunein jeriche-
jeein neeine jana ichoharaa-
ruhane.

- ²² Inae chaelai janonaa bana nihei
nacoaunein ii que aohanraa,
nenatein quitara rijijiein nena
totein, aunone maajeein totein,
coreneta tocohanein nena
toroonfeta, naaonjoainuri totee-
ruhane.

Inae nerinaain ii que amihaneeni.
Niheichu aohanrarinaain tonijiai-
niha natiin ichaain cha tutuera.

- ²³ Chaenchu
chaelai janonaa bana nihei, ii que
niha conone jana,
ii que aohanraa tonijiai ichaain
nisirihateeuruhane jaa besetane.
Coatiha
inae chaque nelatein neeuhi
ichei rucuhele que necoretein
nenacaauru,
satiin chauratane que nenacaauru
amurijiriin itolere que nelaetoha
nocoetiin neeuhalu natiin.
Chaen techu,
benaniha nocoetohine que,
satiin lauri lauri nenacaauru
cachaauru coritaain nerejetohi,”

nae nii anjera.

²⁴Nii nese quete erunojoi ne niicha
sohin niicha jaaorilu *profetacuru*
coichana, chaen nii janijiin Cana
Coauneraacha ranojoinurilu rai

cachaauru, chaen satiin caa chauratane que sohin niicha jaaorilu coichana, naaonjoainuri.

19 ¹Nii baiha jataain arajiin dedeeu tonijiaain ereeuruha cachaaaurune jana aonacaaunne janate:

“Cana ichoteraneein nenea cana Curuaanaa coroaecuche.
Nii itolere ichana naineein,
rai necaohacha que necaohachaaain,
naaonjoaain nihane jaunte
cana ichoteraneein Cana Coaunera-
neen ne.

²Acate
esinae rauhijiriin baaso icharaauru
coaraain
casetecaeraneen ne.
Nitohanihane jaunte,
rai jaberoco aina cuaain
satiin chauratane sacuritaain
nenacaauru cachaauru saruhin
niha osa quene jaun,
nii ene cojoaeloroheri rijijieein
nenea casetecae.
Cana Coaunerate
rai cachaneein nenacaauru
ateinaain nihalune
core coarate que,”

naaure.

³Nii baihate nacoaauneen:

“Cana ichoteraneein nenea cana
Curuaanaa coroaecuche.
Nii chariji bana jianelanaalate
ecuun iniha cureein nii ene cojoae-
loroheri rijijieein nenea-
Babilonia nese moco cousuruca,”

naaure dedeeu tonii.

⁴Nii janate, curuaanaa nihane jaan rori- *trono* ichoae lauhaca Cana Coaunerane jana, nacatiha neseeon-
riaain: “Cana ichoteraneein nenea cana

Curuaanaa coroaecuche. Nitohane-
miin,” naain Cana Coaunera coroaecure,
nii coroata choonca jenaain nenacaauru
ichauhenaauru, chaen nii jenaain cache
tocorijianein ichaohin nenacaauru
naaonjoainuri. ⁵Nii janate, nii
curuaanaa nihane jaan rori- caje toniin:

“Satiin inara canaanainuru, ichauhe-
naauru, naaonjoaineeichene
Cana Coaunera coroaecuche,
nelateen acaneein nihane que
casiichene coarateen neinequi-
chene,”

naain toniha erenaane jana aohanrae.

**Rai cachaneein nenacaauru aina beseta
ichaa Carenero Narejeene jaan
cojoanonaa que turuhane**

⁶Chaen nechú tonijiaain toniha arara
aina caraturine rijitiinchuru iriha arajii
cachane jana aonaaun. Nii janate:

“Cana ichoteraneein nenea Cana
Curuaanaa coroaecuche.
Inae itolere Curuaanaa neen nihane
nunuhetiha cana Curuaanaa,
itolere que nelateen,
itolere ichana naineraneein nenea
Cana Coaunera.

⁷Aihane jaun
coanete rachoojihacache.
Esinae rauhijiriin
rai necaohacha que necaohachaaain
niha Cana Coaunerane coroaee-
caache,
inae nisirihatiha Carenero
Narejeenne jaan cojoanonaa que
turuhane jaun.
Inae letona jatoraain neruujia rai
comasainu.

⁸Nitohaneein jereraane jaunte,
somajai cajione caohacha jiquihaqui
que necoreete nii Carenero
Narejeen comasainu.

Nii cajione caohacha somajaain
jiquihaquiin nenaate,
esinae rauhijiriin jeriha Cana
Coaunerane rijijieein
niicha ranojoneein nenacaauru ne,”

naain tonijiaain toni erenaa. Satiin rai
cachaneein nenacaauru raa Cana
Coaunera Calaohi Jesocurisitone que.

⁹Nii janate canu rai: “Caa laenaaun:
‘Raotojoein turuuhine nii Carenero
Narejeen beseta que cotihanohichuru.’
naa caraine baihate: ‘Caa erenaate, inae
rauhijiriin Cana Coaunera beratenojoin
erenaae,’” nae carai nii anjera.

¹⁰Nii jana coroaecaaune coina, nii
anjera tijia asaee neseeriaanune janate:
“Caa nitohanai ichana coaauca. Canuhe-
tonaine Cana Coaunera cacha neein
neeun, jerichanejeein nii aaine rijijieein.
Aihuruha nii ii nejeraauru, acaauru rai
aitoha Jesocurisitone rijijieein, naitoon-
joan tonoraain nenacaaurune rijijieein.
Aihane jaun, Cana Coauneraacha
coroaecu,” nae canu rai nii anjera.

Nii Jesocurisito que erenaa techu,
profetacuru que beratenojoneein nelu.

Cabario somajain ichoae cunaa

¹¹Nii janate dede que ecooca
somajaain cabarione jana, nichoae
laujuae- nii suujua rijijieein nesineneein
curuajai. Acate esinae rauhijiriin baaso
icharaauru cachaauru ichao rucujueein,
que nejeratenacaauru amuritiin nelu.

¹²Rai notate jiquihaquiin usi lanaro
tocohane. Nii janate, arajiin rai coturi
que comai amaane jana, que
laenanohineein ne rai curuaa. Leinjiin
acaachate nii curuaa coitucujue. ¹³Nii
jana rai cajionete, ichana que lomono-
join tocohane. Jana rai curuaate: “Cana
Coaunera Ere,” nae. ¹⁴Nii janate caajie
uure dedeeu anjeraauru- cajione
caohacha somajai que necoreetein-

cabario somanerei ichoae uhin. ¹⁵Nii
janate rai nujuaae caje mitue sabere
ajihantiin, satiin lauri lauri nenacaau-
ruru amuritoheraneein nihane cojunaca-
neein. Acate coata caje nenea otiha que
biji achunequiin, acaauru Curuaanaa
niha cureein. Acate, cana tijia que oba
shaoquiin, rai baca rocohacane
rijijieein, baaso icharaauru coaraain
casetecaain, rai nobaeneein caseteco-
curu que banihatein niicha rucujei-
bino que acaauru cocoa cureein nii
itolere que nelateein- itolere ichana
naineraneein nenea Cana Coaunera.
¹⁶Chaen techu rai cajione, rai nanaae,
naaonjoain que:

Reychuru rey- curuaanaacuru Curuaanaa

naain laenanohineein ne Acaneei nihane
coitucueratera rai curuaa.

¹⁷Chaen nechuu enoto conohanau
chujuhacoha leinjiin anjerane jana
coaracaauune janate, satiin tajaee iniho
que lenoneein ecuun jiaauluhin amuna-
caauru rai tonijiaain: “Chajaauchete
netaojiaete tabai lenone que inara
coroaatemiin Cana Coaunera. ¹⁸Aihate
Curuaanaacuru *reychuru*, soondarooru
curuaanaacuru, laraajiin nenacaauru
cachaauru, cabariocuru, nichoae
cunacaauru, itolere inihocuru, letonone-
lanaala nenacaauru, letononeein
nenacaauru, nelatelanaala nenacaauru,
nelatein nenacaauru, naaonjoainuri
iniho que lenonequiche,” naain
ehequiin nii iniho que lenonenacaauru
tajaacuru cotihacane aonaan.

¹⁹Nii baihane, nii necha aansai
ataebinae tabai aina, satiin caa chaura-
tane que nenacaauru curuaanaacuru
aina sonaana que neeninuru acaauru
soondarooru coaraaun. Acaaurute, nii
cabario ichoae lauheconaa aina rai

anjeraauru sooruhane caina netaojiaaure. ²⁰Nii janate, nii necha aansai ataebinae tabai mucuhin casetecaure, nii rai *profeta*- nacatiha neein itolere cojoelanaacojoai ichara aina curuaaecaain. Nii itolere cojoaelanaacojoai ichaane aina cuaainte, nii necha aansai ataebinae tocohaneein niicha ichacuri cojunaca teratein rai ecaanto coroaeraauru cachaauru coritae nii rai *profeta* niha nocoeti. Nii jaunte, nii *profeta* niha nocoeti aina curuaaecaain, nii necha aansai ataebinae tabai jaaore ichaaojihane jana, usi conemuri asojoereneein moconaa cuhane. ²¹Nii jana leeochoaurute, sohin jaonojoinecure, nii cabario somajai choae laujuaain cunaa ujuaae caje mitunaa sabere ajainai que. Nii janate, nii onacaauru iniho quihure nainaan obejeein nii iniho que lenonenacaauru tajaacuru.

Le oaraanca jaanacaneei ichohanojoi niha moconajaerane

20 ¹Nii janane, *cadena* que bijichunequiin atane jachu chariji bana satonoelanaala nena cochabi uhaain fauha uha leinjiin anjera dede cajene jana coaraaun. ²Nii anjerate fauhin, nii ataebinae tabai acano inoaensi- moconajaera ichojoae, le oaraanca jaanacai que tihane reein tiaaajoaain. ³Nitohaneein ichojoaaint, nii chariji bana satonoelanaala nena atane jachu tabai cuhane fuhin, nii fuera que nii cochabi te, le oaraanca jaanacanei que tihane reein tiaaajoaain, nabana caa chauratane que nenacaauru cachaauru coritaane coataa. Inae le oaraanca janacanei que turuhane banate jianenohiniha cureein carajaelanaala.

⁴Nii jana, nii curuaanaacuru roritrone coaracaaunne janate, nichoae launereure nii baaso icharaauru

coaraain rucuharanu que cocoaainohineein nenacaauru. Chaen nechu, Cana Coaunera aitonjoan beebejeein, jataain esinae rauhijiriin beratenojonihane rijijieein Jesocurisito aitonjoan tonoraauruhane coreniha, coturi molonojoineein onacaauru suujue netonai ecu neeure. Acaaurute, rai biji, nauri, naaonjoain que nii necha aansai ataebinae cojunaca teeuruhane jerelanaala, chaen nii necha aansai ataebinae tabai aina nii tocohaneein nena ecaantooru corojelanaala nenacaauru nelu. Acaaurute nii ooruhane baiha nacoaauneein ichanaain le oaraanca jaanacanein Cana Coaunera Calaohi Jesocurisito jiniichaaain curuaanaaneein neeuruhane jana coaraaun. ⁵Niichurute ichoaichaniha oo caje ichananacaauru ne. Leeochoauru laen ooruhane baiha ichanacuruhi, le oaraanca jaanaca reein tiaaain. ⁶Jataainte nerausiaaejeein niha cuurureein nii ichoaichaniha oo caje ichananacaauru, inae Cana Coaunera cachaneein aina jiniiquin neeuruhane jaun. Oha cachane baiha itajeraneein nena coatiha acaauru aina chaachasihei. Acaaurute Cana Coaunera aina rai Calaohi Jesocurisito rai saseredotenein le oaraanca jaanacane reein tiaain aina curuaanaa neein neeurureein.

Moconajaera amuritooruhane

⁷Inae le oaraanca jaanacanei baihate, caseteconihane caje mitanojoi niha cureein atane jachu tabai caje nii moconajaera. ⁸Nitohaneein mituhinte satiin caa chauratane que lauri lauri natane que ichaonacaauru cachaauru rene cuhin, enoto mitu nichajai jeloan, enoto so nichajai jeloan, enoto mitu nichajai coarajeein cana ajaabiji nichajai jeloan, enoto so coarajeein cana ajaabiji nichajai jeloan,

naaonjoainuri nii Gog aina Magog neein niicha curuaatehuri coritareein. Nitohaneeinte cucuana cuhane nenea carene catuniji jeeoneein acaauru cachaauru taojiareein sonaana que nihane caina.

⁹Nitohaneeite satiin chauratane sacuritaain cuhecujeein, jataain nii Cana Coauneraacha belaa nese tinonohin, nii Cana Coaunera cachaneein nenacaauru curuacaain tinonocure. Nete inae dede caje naluha usine jaun, jitariin acaauru mocohin acaauru itaje. ¹⁰Nii jana, nii acaauru coritaera moconajaerate, usi conemuri asofere neein mocohin nenea cuhane jaonojoneei ne, nii *profetaniha* nocoeti aina curuaecaain, nii necha aansai ataebinæ tabai jaoruhane jaan cuhane. Ecute janotiin, jiichoo, naaonjoaain caseteconein mocoha cuurureein nii chariji bana satonoelanaala.

Rori somajai acatiha teein caohacha ichacurenihane, baaso ichacuruhane coitucuuruhane

¹¹Nii jana curuanaacuru rori- *trono* somajai coaracaanne janate nichoae lauhaca leinjiine jana notaracae jataain caohacha nitajeeriin nii chunijihun coarinojoinelanaala nitaje chauratane aina dede. ¹²Nii janane itolere que nelatein nenacaauru, chaque nelatela-naala nenacaauru, naaonjoainuri onacaauru coaraaun, nii curuaanaacuru rori- *trono* acatiha chujunereeuruhane jana. Nii janate, ecu joaracaeraain nihacoaa quirichaurune jana, nii chabana satonoelanaala nenea ichaonaa que ichaohenihuru curuaa siricha leeocho quiricha netonai ecu joaracaeraain ne. Nii onacaaurute colurujueno-joinnein neeuruhane caje rucuheno-joinnein neeure- acaauruhacha ichai rijijeein, nii quiricha cuhane laenanohinein nihane rijijeein. ¹³Nii

jana satiin nii cucuana cuhane jaonojoneein onacaaurute caje mitaain tenojonecure. Jerichanejeein techu nii ohin aina nenacaauru te, nii onaa curuaanaa neein nenea. Nii janate satiin acaauruhacha ichai rijijeein rucuheno-johinein neeure le cacha cachaauru.

¹⁴Nii baihate, usi conemuri cuhane jaonojoneein ne nii onacaauru curuanaa neein nenea, nii nitajeraai nenacaauru aina jiniiquiin. Nii usi conemurinein nenaate, oha cachane baiha cacha itajeraneein nenea ne.

¹⁵Ecute jaonojoneein neeure, chabana nitajenaachara nejeein nenea ichaonaa que ichaohenihuru curuaa siricha quiricha cuhane laenanohinein curuaa sirilanaala nenacaauru.

**Ena nenea chauratane
aina ena nenea dede**

21 ¹Nii baihane ena nenea chauratane, ena nenea dede, naaonjoaain coaraaun, inae nitajiha nii jauriaanejeein nenea dede, chauratane, cucuana, naaonjoainurine saijieein. ²Nii janate, dedeeu Cana Coaunera acatiha nihane caje fauha uhe Cana Curuaanaa nese neein nenea- enachasine Jerosaleen. Charijieein teeinti, nelana-janaa jerihane caohatiin necoreetein ne leinjiin ene, nii rijijeeinte jataain caohatiin rai necaohacha que necaohachaa inaiha nii ena nenea Jerosaleenne jana coaraaun. ³Nii janate, nii Cana Coauneraacha nelaorianajaan rori caohacha tonii: “Inae ena caje coauneite, cachaauru aina ichaoreein Cana Coaunera. Nii janate, acaauru aina ichaohane jana, rai cachaneein niha cuurureein. Chaen techu nii jeelai Cana Coaunera, acaauru Coauneraneein acaauru aina nereein. ⁴Nii bana inae nerinaain chananaa, nerinaain onaa, inaderanaa, cunaeriin niha cachane

jaan, naaonjoainunri. Nitohaneein inoalenlu nenea ichaonaate inae nitaje,” naa erenaa dedeeu toniine janane aonaan.

⁵Nii janate:

“Canune nacoauneein enachasine neein itolere coaunaain neen. Caa erenaa ichei aitorichaaunine jaan laenaan. Acate esinae rauhijiriin nohanelanaala ichei aitorichaaunine rijijieein airichaainne coina erenaa ne,” nae canu rai, nii rori caohacha ichoae laujuai.

⁶Nii baihate:

“Inae nitohaneein ichanohiniha. Canune itolere nunuheteraneein satono teraneein neen. Chateeinti cocoirihane jesinaeca arihane rijijieein Canu ariin ne, niine core colane cocoareeuni, nii chariji bana satonoelanaala ichaonaa tera jesinaeca que. ⁷Chateeinti itolere necairichanaa abaataain satono que tiaain ne, nii raite cainanohiniha cureein. Chaen techu rai Coaunera nichaaunne jana, aca canu calaohineein nereein. ⁸Nena laen nii Canu sacunaa jeriheichuru, nii Canu esenetana jeriheichuru, namute cacha cotaairiin nenacaauru, sonajaain jaoreraauru, rai sinijeranelanaala nenea ene aina ichao jeraquin nenacaauru, namute quicha aina ichao jeraquin nenacaauru, benaneein nenacaauru, nii ichanohichuru ecaanto coroaeraauru, satiin casajeeuru, naaonjoainurite, nii ohane baiha cacha itajeraneein nenea usi conemuri asoferenein moconaa cuhane jaonjoiniha cuururein.” nae canu rai.

Ena nenea Jerosaleen nese

⁹Nii janate, nii caausineein anjeraauru nii caainsii muruaeneein satononejeein cacha cairichaeranu que biji achunequin nenacaauru caje nenea leinjiin anjera:

“Chajaaute caa coarae. Caate Carenero Narejeen comasainu que nenacaaurune,” nae carai, nii satiin Jesocurisito ranojineein nenacaauru coarateein.

¹⁰Nii janate, nii canu que Cana Coaunera Suujue coaratenojoin ichatane ucuuno seeonjoan que canu amaa, dede caje Cana Coaunera acatiha fauha unaa Cana Coaunera nese Jerosaleen coarate canu que, nii leinjiin anjera. ¹¹Nii janate, conoha Cana Coaunera necaohachane tocohaneein, jataain caohatiin cono te nii nese. Jataain coretiin nenea ajeri jaberoco tocohaneein jiquihaquin, ajeri jataain nojoein nenea jaspe tocohaneein asaaun tiaain inanacatiin. ¹²Nii nese tinonocoritinte ne, jataain ecuunein rijia lechoonca coroata bacuujaain. Nii janate, nii acuuja nainetiin neeure leinjhanaain anjeraauru. Nii nese bacuuja nainetiinte ne, laenanohineein lechoonca coroata lauriin nenacaauru Isaraelitacuru neferate curuaacuru. ¹³Nichatajai acuujuate ne, enoto mitu nichajai que. Jana nichatajai acuujuate ne, enoto soo nichajai que. Jana nichatajai acuujuate, enoto soo coarajeein cana raotono nichajai que ne. Jana leeocho nichatajai acuujuate, enoto soo nichajai coarajeein cana ajaabiji nichajai que ne. ¹⁴Nii ajeri laenanohineein niha lechoonca coroatajai Carenero Narejeen rai afosotooru curuaacurune jaan ajeri quete temurae nii nese coriha rijia.

¹⁵Nii canu aina erenaa anjerate, oro caje ichanohin cojunacatihane jaannu amae, que nii nese coujunacateein acuujaauru, rijia, naaonjoainuri cojunacatihane jaanu que. ¹⁶Nii janate, rai caare aina ita jaraaone rai jaratono. Nii cojunacatihane jaanu que niicha amai que, nii nese cojunacatiha nii

anjerane janate, coroata oaraanca
coroata fasha quilometorone rai caare,
jaratono, nucuuno, naonjoainuri. ¹⁷Nii
baiha nii rijia ucuuno cojunacatiha,
joenreein cha cojunacatiha cachaau-
rune rijijiei metoro quene janate, saota
choonca saogui metoroe.

¹⁸Ajeri jataain nojoein nenea jaspe caje
ichanohiniha rijiane janate, bidirio
jicharoaain ichanohin tocohaneen, oro
nejesina caje ichanohi ne nii nese. ¹⁹Nii
janate, jataain coreein nenea araai laurii
ajeri caohacha que urerianohineen ne, nii
rijia temuracuru ajerichuru. Nii jauriaane-
jeein nunuhe neen nenea rijia temurate,
ajeri nojoein nenea jaspe caje ichanohi
ne. Jana nii coroata temurate, ajeri
caohacha safiro neen niicha curuaateuri
caje ichanohi ne. Jana nii nichatajate,
jataain jiquihaquuin nenea agata caje
ichanohi ne. Jana nejenate, esmeralda caje
ichanohi ne. ²⁰Nii jana nesaquite, ajeri
onesi caje ichanohi ne. Nesaotanete,
lanaajiojoaain nenea cornalino caje
ichanohi ne. Jana caainsiinite, jataain
jiquihaquuin nenea crisolito caje ichanohi
ne. Jana fosanite, berilo caje ichanohi ne.
Jana isconite, topasio caje ichanohi ne.
Lechooncanite, beraurosiojoaain
asaauntiaain inanacaain nenea curisoprasa
caje ichanohi ne. Jana nii lechoonca
leinjiinte, jataain coretiin nenea ajeri
jasinto caje ichanohi ne. Jana nii
lechoonca coroatajate, jichosijiojoaain
nenea amatista caje ichanohi ne. ²¹Nii
lechoonca coroatajai acuujuate ichanohi
ne, lechoonca coroatajaain jataain ajeri
caohachaneen nenea perla caje. Le
bacuujuaauru acuujuate ichanohi ne,
leinjihanaai ajeri perla caje. Jana nii nese
cataaun cunaa nese coerote, bidirio
tocohaneen jiquihaquuin asaaun tiaain
inanacaain oro nejesima caje ichanohi ne.

²²Nii jana coatiha nii leinjiinijin
Teenforo coarinaaun nii neseu, cana

Curuaanaa itolere que nelateen itolere
ichana naineraneen nenea Cana
Coaunera, rai Calaohi- Carenero
Narejeen aina ecu nenea Teenforo
neeuruhane jaun. ²³Nii jaun coatiha
enoto, atene, naonjoainuri lateen
nihei nii nese conaeranu que, inae rai
necaohacha que conaa Cana
Coaunerane jana, rai cono neen niha
Carenero Narejeene jaun. ²⁴Satiin lauri
lauri ichaonacaauru cachaaurute, nii
nese que conaeraain nii nese que
amuhemuhecureein. Nii jana satiin
caa chauratane que nenacaauru curuaa-
naacuru *reychurute*, itolere
acaauruhacha latei teeurureein acaauru
rai. ²⁵Niheichu nii chariji bana
nefurinaain acuujuu. Niheichu ecu
nerinaain nocohena. ²⁶Satiin lauri lauri
ichaonacaauru cachaaurute, raotojoein
neeuruhane jaanu, acaauru necaohacha
que necaohachaaain neeuruhane jaanu,
naaonjoinunru amaaureein nii neseu.
²⁷Nete laen, nii chariji bana enoorene-
reein nii Cana Coaunera rai caohacha-
nelanaala baasoneen nenacaauru.
Niheichu, nii namute cacha cotaairiin
casajenetiin nenacaauru enonaa
nainecururinaain. Leinjiin nii Carenero
Narejeen nii chabana satonoelanaala
nenea ichaonaa que ichaoenihuru
curuaa siricha quiricha cuhane
laenanohineen curuaa sirichaauruha-
chate, enonaa nainereen nii neseu.

22 ¹Nii baihate, leinjiin nucuhe
ajiarojoeritiin nenea ichaonaa
tera nucuhe coarate canu que nii
anjera. Nii janate, Carenero Narejeen
nelaurianaja aina, Cana Coaunera
nelaurianaja rori *trono* jeelai caje mitue
nii acau- ajiarojoeritiin asaaun tiaain
inanacanaa. ²Nii nese cataaun cunaa
bero cuhane, chaen nii nucuhe
auhaniha, naonjoaainta ita jeraniha
omarohin le ateeuru naineen inacae nii

ichaonaa tera enuha. Nitohaneente le jaanaca cuhane lechoonca coroata saain inacae nii enuha. Jana nii enuha ichaonaa tera alote nelate que necoichacuruha lauri lauri ichaonacaauru cachaaaurune coina. ³Nerinaain ecu nechu aansaaineein ichoai. Cana Coaunera aina Carenero Narejeente, nii neseu nereein jelai Curuaanaa neein cocoainanacainein. Nii jana rai cachaaaurute coroaeca cuurureein. ⁴Cana Coaunera ainate ita acatiha neein ita coaraain rai nauri que Cana Coaunera curuaa sirichurureein. ⁵Ecu nerinaain nocohena. Cono laatecururinaain nii rai cachaaauru. Enoto niha natiin laatecururinaain. Cana Coaunerate, acaauru cono neein nereein. Nii rai cachaneein nenacaaurute curuaanaa niha cuurureein chabana satonoelanaala.

Ichuunijihia turuha Jesocurisitone

⁶Nii baihate:

“Caa erenaate esinae rauhijiriin, nii nohane lanaala ichei aitorichaaunine rijijieein airichaaaine coina erenaa ne. Nii Cana Coaunera, nere beebejeeuruha *profetacurune* coina berateralute rai anjera letoae, inae ichuunejeeonriha nitohanerichaaainene jaun, rai cachaneein nenacaauru que coaratihane coina,” nae canu rai nii anjera.

⁷Nii janate aonacaaunne jana: “Carajae lanaalane inae turuha ureeunni. Nerausiaacate cuurureein caa quiricha cuhane laenanohineein nena Cana Coaunera beratenjoin tonoraain nenacaauru,” nae Cana Coaunera Calaohi Jesoso.

⁸Canune Joaan neein coaraain aonaaun. Nii coaraain aonacaaunne baihane, nii canu que coaratera anjera tijia asaae neseeonriaaun, coroaecaune coina.

⁹Nete canu rai:

“Caa nitohanai ichaa. Canu netonaine aaine rijijieein, Cana Coaunera cachaneein neeun. Satiin ii nejeraauru, caa quiricha reretaain coaraain tonoraeraauru, Cana Coaunera ere que erenacaauru- *profetacuru*, naaonjoainuri rijijieein neeun canu netonai. Cana Coauneraacha coroaecu,” nae nii anjera canu rai.

¹⁰Nii baihate coaiteen aite carai:

“Caa leeochoaauru rai belanaala caa quiricha cuhane laenanohineein nena Cana Coaunera ere rucuheca ii suujuaacha cuhane. Leeochoaauru rai beeu. Inae jataain ichuunijihia nitohanai cojoanona que turuhane. ¹¹Chunocoha cacha Cana Coaunera ere aohana jerenihane, nihei tonaain erenaa najaanu. Nirijieeincha baaso ichajeein sacuhane coina roeroecanaa nainihacache. Esinae rauhijiriin caohachaaain suujua coaraain Cana Coaunera sacunaa jeriha cachane, jelai teen Cana Coaunera cachaneein nihane jeriha Cana Coaunerane rijijieein sacuhane raite ne,” nae nii anjera canu rai.

¹²Niritiinte: “Aiha. Carajaelanaalane turuha ureeunni. Chaen nechu, acaauruhacha ichai nainejeein cainacaune jaanu uhaain ureeunni, le cacha cachaaauru rai tihanune coina. ¹³Canune jauriaanejeein itolere nunuheraneein satonoteraneein nena neeun” nae Cana Curuaanaa Jesoso.

¹⁴Nerausiaacate cuurureein canu esenetaauruhane coreniha rai nosa caje canu ichoteratenojinein nenacaauru, nii ichaonaa tera enuha inaa leein, Cana Coauneraacha rucujuei nenaanajaun enonaa nainecuruhane jaun. ¹⁵Nete laen enoelanaala jianacoon nedaaaurureein, nii Cana Coaunera coitucuelanaala nenacaauru, baasoneein ichaonacaauru cacha baasooru, benanenein

nenacaauru, sinijerane lanaala nena
ene aina ichaojeraconacaauru, enecuru
nihanatiin rai lananelanaala nena
quicha aina ichaojeraquiin nenacaauru,
sonajaain jaaorera, ichanohin ecaanto
corojeein nenacaauru, satiin nechu
jataain coritaraacha ichajeein, acaacha
ichajeein nenacaauru, naaonjoainuri.
Nii janate:

¹⁶“Canune Jesosoneein caa canu rai anjera
letoaaun, satiin caa aitothane rijitojoein,
janijiin canuhacha raauri canu cachaauru rai
biha cuhane coina. Canune Rabiri caje
nefoeratenaneein neeun. Canune janonaa
rai mitunaa arasijie rijijieein neeun,” nae.

¹⁷Cana Coaunera Suujue, Carenero
Narejeen comasai, naaonjoainurite:
“Chajaau,” naauruhane jana: “Chajaauijian,”
naaurureein aohanraauru. Chunocoha
cocoireein acau conaa jereein uhite, nii core
colane ichaonaa tera acau coreein.

¹⁸Satiin caa quiricha cuhane
laenanohineein nena caitoonjoante

aitocooaunne rijijieein situreein.

Chunocoha cau caa quiricha cuhane
nihane amurijiriin jojoin nenaate, caa
quiricha cuhane laenanohineein niha
caainsii laurini cacha cairichaeranu jaan
que cairichaa cureein Cana Coaunera.

¹⁹Jana chunocoha caa canuhacha
beratei quiricha cuhane laenanohineein
nena corein, que cacha relaelanaala,
naaonjoain nena cajete, nii ichaonaa
tera, que banihateein niicha rucupei
enuha inaa rulureein. Chaen caa
quiricha cuhane laenanohineein nena
Cana Coaunera nese neein nenaane
maajeein caje rulureein.

²⁰Caritiin aitiinte: “Aiha, carajaela-
naalane inae turuha ureeunni,” nae
Cana Curuaanaa Jesoso.

Nitohanemiinjian. Chajaain sorotiin
uu Cana Curuaanaa Jesoso.

²¹Cana Curuaanaa Jesoso itolere
inaraacha latei teein inara rausiaae-
miinte raotojoein neeiche.